



TAPAK 7

Salman-i film industry nung ayanger 25000 yaritsü



TAPAK 9

Ajungbena shibangba ajanga nübür ratamatadaksür: Rahul Gandhi

VOL. XVII NO. 151(ADOK 151) DIMAPUR

TENTONÜ (MONDAY) METSÜREMI (MARCH) 30, 2020

5.00

Dimapur nung civilian volunteers memelar

Dimapur, March 29 (Agencies): Dimapur district administration-i Dimapur telongtet nung civilian volunteer tem entry points nung memendaksütsü telemtetba agiogo.

Nagaland ajunga shibangtsü tenzüka sülen Dimapur kübok Karbi Anglong den arrtsütepa aliba tesem kar nung lanur volunteers mapa lemezükja inyadaksür. Mezüngbo iba ya police den yaritepa ama liasü saka linük ajungalen nisung o nisung tsüngda metre kabosa tepila ayutsü tetuyuba agütsüba den meputepi aküm.

Volunteer aser police temi nüka mitdang parnok telong junga noktakteper aliba noksatem social media nunga prokshia

liasü.

Iba nung ajemdaker, Dimapur Deputy Commissioner-i "Hombar nungi entry points nung sorkar nübortem dak alia tangar shinga mapa lemezüka meinyadaksütsü" ta tetuyuba ka agütsüogo.

Nisung telongjunga adenshiba nung lendong keta aliba dang masü saka tang ya district ajungalen CrPC section 144 ozüng agüja lir aser iba ajanga nisung 5 dak tema madenshitsu ashir, ta Deputy Commissioner-isa ashir.

Dimapur district nung medical personnel aser tanga essential services senzusenbongba nung timtem kecha magütsüsüla, ta paisa nenshia metetdaksüogo.

NPF-i Tsüngrem tenüng asanger PDA sorkar dang asüngdang

Dimapur, March 29 (TYO): Novel Corona virus (Covid-19) wara ajanga alima ajunga den külemi Nagaland state shibanga lir, ajisüaka tanü tashi Nagaland nung Covid-19 aketer ka dang meputetba atema Tsüngrem nem tenüngsang agütsür, ta Naga People's Front (NPF)-i metetdaksü.

Nagaland nung health-care mapa inyaker aser police-i iba tashidak meprokshidaksütsü atema mapa inyakba atema pelar aser tenüngsang agütsür. Ajisüaka, state sorkari iba atema sentong renemba aser sorkar mapa inyakterem itasen nungi sen agizükba atema tebilemtsü abener, ta NPF-isa ashir.

CM Relief fund tentetbaji tajung aser iba ajanga nisungtemi loktiliba ajungtsü atema pei pei akok tenla agütsüteter, saka tenla agütsübaji pei mulung agi asütsüla aser tashiyim agibo magütsüdaksütsüla, ta Press Bureau, NPF-i sangdong ka nung ashir.

"PDA sorkari department kar nung inyakterem indang itasen nungi anogo ka indang sen agizüktsü lemtetba atema mepelar. Talisa Covid-19 wara anema inyaker 'Frontline Workers' nung police dena lir saka parnok dang nungia anogo ka indang sen agizükbaji kanga tim masü, kechiyong state ajunga shibangaka, police mapabo kasa dang inyakdar anungji parnok asoshi bilemtsüsüla" ta NPF-isa ashir.

Nagaland nung Sanitation Workers, Doctors aser Nurses den ano kija aser telok balalai alima wara anema mapa inyaker anungji parnok indang itasen

nungi sen magizüki, sorkari meyiper parnok nem ang sempet talila agütsüsüla" ta parnokisa shisem.

"District kar nung jang dena tongtipang tenüngdaksütem peria manguba osang angashia NPF-i tebilemtsü abener. PDA sorkari nübortem dang jang angutsü atema ita asem indang sen agüjang ta ashiba tim masü aser iba ajanga parnok dak tangatetba maliba sayur" ta Press Bureau-isa ashir.

"State sorkari tawa VDB matching grant fund nungi sen crore 17 agizükba ajanga tang tongtipang nungdakattem alizüka atatsü aser iba senji yaser COVID-19 indang Relief Funding nungi meyipa agütsüsü atema onoki tebilemba ka shidanger" ta NPF-isa metetdaksü.

"State sorkari public dang nungi meshimetsü masütsüla aser sen maliba nung atemer mapa inyaksü maoker ta meshii, Goods and Services Tax (GST) dena sorkar keti sen crore aika arubatem amshia, nübör nem tongtipang tenüngdaksütem peria agütsüsüla" ta parnokisa ashir.

Nagaland sorkari COVID-19 atema renema lir ta ashir saka külen tang nungdak facility mali kangshir. Anungji, COVID-19 anema inyakba mapa nung sorkari tashishitsu melii inyaksüla kechiyong iba nung Nagaland sensotem taküm dena lir, ta NPF-isa ashir.

"Tia kaa Nagaland nungbo COVID-19 puteta mali saka putetra, state sorkari kechi inyaksü renema lir?" ta parnokisa asüngdang.

Home Commissioner-i COVID-19 indang osang metetdaksü

Dimapur, March 29 (TYO): Deobar nikongtsütsü 3:00 ako nung Nagaland Home Commissioner, Abhijit Sinha, IAS-i state nung Covid-19 indang osang metetdaksü.

March 6, 2020 sülen tangalen nungi arur, kaketshirtem dena nisung 3982-i pei pei District Surveillance Team nem osang sangoktsü aser home quarantine nung liasü, ta pai ashir.

Nisung 3982 nungi 3590 tashi tang home quarantine nung lir aser parnok 392 bo quarantine mapang temogo, ta Abhijit Sinha-isa shisem.

Health & Family Welfare department-i district 11 nem PPE 740 agütsüogo. Itemji

Kohima nem 200, Dimapur nem 100, Mokochung aser Mon shia nem 90, Wokha nem 50, Tuensang, Phek & Zunheboto shia nem 40 aser Kiphire, Peren & Longleng nem 30 agütsü.

Tanüngba PPEs ji State headquarters nung yua lir. Maneni, department-i rongdak nungdak atema Ambulance 133 tashi renema lir. Ambulance temji arogo, Para Military, NGOs, kija, nija aser sorkar mozü kitem indang lir, ta Home Commissioner-isa ashir.

"Yashi, March 28, 2020 nü Nagaland Chief Minister-i n-



Abhijit Sinha, IAS

Covid Nagaland app sayatsüba nung nisung 1523-i tanü tashi nung tenüng register süogo. Nisung 312-i osang tejangja magütsü lir anungji nenokia iba app nung register asütsü mepishir. March 6, 2020 sülen tangalen nungi Nagaland-i arur ajaki app nung register asütsü metetdaksür" ta Abhijit-isa nenshia metetdaksü.

Tang tashi nung samples 22 tashi tendangtsü atema bener yok aser iba nungi 17 negative ta osang nguogo aser 5 indang osang ano mangu lir, ta paisa shisem.

"Nagaland ajungalen tongtipang tenüngdaksütem aser osettem peria dang lir. Iba indang osang ya anogoshia

metetpelar. Nagaland nung aliba FCI godown tem nung ita sem ser tesadang achitsüsa PDS jangotsü peria dang lir" ta Abhijit-isa metetdaksü.

"Covid-19 ajanga state ajunga shibangba mapang State Level Control Room ka lapoka lir. Anungji timtem mesüra tetsükdaksü ajurudang 0370-2291122 aser 0370-2291120 ajanga tongteptsü metetdaksür. Nagaland nungi nisung kar danga tangalen anendaka lira mesüra timtem kar ajurura, item number ajanga osang sangoktsütsü shisemer" ta Home Commissioner-isa ashir.

"Sorkari tuyuba ama public-i maneni kidang dang amongtsü aser dokani shishii aodang, tepila ayutsü nenshir" ta paisa shisem.

Ano külen, osangbener Nagaland Chief Secretary dang Centre-i Covid-19 atema state balala nem sen agütsüba indang osang metetnua asüngdangdang "Nangzüka aliba dak alaka tang tashi nunga Centre nungibo ano sen meyok" ta pai langzü.

"Asen state sasep nung aliba rongsen amshia Covid-19 anema mapa inyaker. Centre nungi ano sen kecha mangu lir aser kodang ngudir osang metetdaksütsü" ta paisa ashir.

NSBIHRC-i sorkar dang nübortem yaritsü ayongzüker

Dimapur, March 29 (TYO): Nagaland State Board of the International Human Rights Council-i state sorkar dang shidi ka ajanga tebilemba kar lemsatepogo.

"Chief Minister-i anir state lennirtem, Chief Secretary-i anir administration aser Civil society lennirtemi anir yimtsüng tashi nung lennirtemi maparen ajak nung ochishia inyaksü mepishir. Nenoki mapa inyakba osang aser temetetsütem ajak social media dena media platforms ajak nung sangdongtsüla" ta Nagaland State Board of IHRC-i ashir.

Guwahati mozü ki balala nung cancer agi shiranger aika Chemo courses agir. Dimapur nung mozü mangur aser tang shirangertem kanga timtemer. Ano külen, pacemakers enoka aliba temulungjang timtem lir aika lir. Anungji, state sorkari item shirangertem atema ambulance renema ayutsüla aser parnok mozü shitak angutsüsa mapa inyaksüla, ta parnokisa ashir.

Tanga district nungi arua azünger aika Dimapur aser Kohima district nung lir. Parnoki pei alidaki moutettsüsa tensa ajuruba ajanga timtemteper aser parnok aika jangotsü aser

aonsotsü alitsü makoker, anungji parnok ket nung BPL card maliyonga sorkari jang aser tanga nungdakattem agütsüsüla, ta parnokisa metetdaksü.

Maneni, Railway Station nung anendaka alirtem nem chiyungtsü aser anenzükdak agütsüsüla. Hotel kar nunga nisungtem taolen makai aliba osangtem lir, anungji sorkari helpline numbers ajanga parnok yaritsüla.

Kibong karbo anogoshi aayangyi aoba ajanga dang chiyunga-jema alir aser parnok rongnung Auto Driver meyirjang aika lir. Anungji sorkari parnok yaritsü atema lenmang kar bushitsüla aser iba atema yimtsüng ketdangsertem mesüra police-i PA (Public Announcement) system ajanga osang tongta teyari balala agütsüsüla, ta Nagaland State Board of IHRC-i sorkar dang ashir.

Village guards aser volunteers-ia mapa inyakdang tekümdangtsü aser teinyaksü ajak shitak inyaksüla. Colony/village gates mita anükertemi tepila ayutsüla aser sensotem nem timtem magütsüsüla, ta parnokisa ashir.

Medical mapa inyakterem asoshi Personal Protective

Equipments (PPEs) peria mali anungji state sorkari District Hospital ajak nung peria agütsüsüla. State sorkarisa tekaratiba nung Nagaland nung COVID19 testing centre ka laoktsüla.

Ano, shishilembadak mask peria mangur anungji sorkari skill development nung tailoring projects kübok training agütsürtem nem allowances aser materials agüja yangludaksütsü nungdaker, ta parnokisa ashir.

Talisa, Nagaland sorkar kübok department balala nung inyaker shia itasen nungi anogo ka sen agizükba ya anentsüla. Iba melena traffic, police aser medical personnels nem ang special allowances agütsüsüla, ta Nagaland State Board of IHRC-i metetdaksü.

Nija mozü ki nung inyaker aika ket nung Covid19 anema raratsü atema osettsüset peria mali, anungji state sorkari iba asoshi mapa kar inyaksüla, ta parnokisa ashir.

District Administration den Municipal Council temi gari lenmang aser public adenshiba tesemtem mapang shia mozü agi merüktettsüla, ta Nagaland State Board of IHRC-isa metetdaksü.



Kohima, Metsüremi/March 29: Phek District nungi legislator temi constituency nung aliba health centre ajunga nem hand sanitizers, Disinfectants, 3 layer masks agütsü. Item oset ya Additional Deputy Commissioner Pfutsero, SMO Pfutsero Chakhesang Public Organization aser lenir balala lia agütsü. COVID-19 tashidak wara den raratsü asoshi Phek Legislator temi agütsüba osettsüset ya Phek HQ aser Sub-division ajak nem asüng tashinung lema agütsütsü.

Lockdown mapang Kohima district nung inyaksü DC-i sangdonger

Dimapur, Metsüremi/March 29 (TYO): State shibangba maparen nung takok angutsü aser kasa mapang nüburtem ajangzüksü asoshi nungdakba mapa inyaksü aser osettsüset shidak belentetsü mechi Deputy Commissioner Kohima, Gregory Thejawelie, NCS ajanga totuyuba kar agütsüogo.

Linük ajunga shibangba ozüng küboki maitertemji itemi alitsü:

1. Hospitals, Clinics, Pharmacies aser medical dak sendakba establishment ajunga, sorkar meyong aser nija meyong. Medical Personnel ajak, aser yangji Doctors, Nurses, para medical staff aser tanga hospital support staff tem menokdang.
2. Ration shops (PDS kübok), aonsotsü ayokba dokan, bakeries, süngjanglijang ayokba dokan, dairy aser mamatzü agütsüba tesem, shi & ango ayokba tesem aser seeds & pesticide dokan. Shishilembaba mapang nisungtem tetsüngta ayuba yimya amshitsüla, aser mapang ajak nung mask aser hand sanitizer amshitsüla.
3. Municipal officers, staff aser sanitary workers melar.
4. Defence, paramilitary aser central armed police forces melar.
5. Helipads, osettsüset belenshitsu atema, evacuation aser ajungben rongdak nungdak atema.
6. State o state tsüngda osettsüset belenba garitem jajatsü melar.
7. Treasury office tem nung

inyaker aser Accountant General office nung inyakerkem, kong staff tajemtiba agi inyaksüla.

8. Nüburtem amshiba: petroleum, LPG, CNG & PNG, item oset belenshiba aser designated pump aser agency nung ayoktsü melar.
9. e-Commerce ajanga nungdakba osettem kidangi bener arutsüba menokdang.
10. Sorkari melaba water supply tankers jajatsü melar.
11. Power generation aser transmission units.
12. Post Offices, NIC aser Early warning agencies menokdang.
13. Banks, insurance offices aser ATM tem aser senotsü ketdangsuba agency tem menokdang.
14. District Administration officials, Police, Home guards & Civil Defence, Fire and Emergency Services, Disaster Management (NSDMA, NDMA, IRS) senzüsü melar.
15. PHE aser Power Department nungi ketdangsertem aser staff tem adangji mapa inyaksüpur melar.
16. Forest Officials aser Social Welfare Officials tem head of office ajanga temelaba agütsür duty senzürtem menokdang. Parnok staff tajemtiba nung inyaksüla.
17. Veterinary Hospitals, pharmacies aser shiruru chiyongtsü ayokba, yangluba aser item dak sendakba osettsüset belenshiba menokdang.
18. Print aser Electronic media,

yangji duty jajaba IPR Department ketdangsertem densema menokdang.

19. Telecom aser internet service agütsütem.
20. Nungdakba osettsüset yanglur aser agütsür, Cold storage aser osettsüset ayuba tesemtem nung inyaker menodang.
21. Tenokdangba nung madenba ketdangsertem aser staff, nungdakba osettsüset agütsürtem memerenshitsu, linük ajunga shibangba ajanga teyari monguteti district nung aliba senzüsebonger aser danga tesem nungi arua mapa inyakerkem tim mesüi mamshitsu.

Maneni sorkari shidangba tsünglanglen agüja alibatem ya meteta alitsüla:

1. Tekülem agiba tesem ajunga shibangtsüla aser tamangba yimsü dak sendakba senten kecha memelatsü.
2. Lokti/ political/ saisapong/ entertainment/kaket reju/sobaliba/tamangba yimsü dak sendakba sentong aser adenshiba nokdang.
3. Asü-ama mapang nisung 20 dak tali adenshitsu memelar.
4. Hotel aser homestay ama hospitality services ajak shibanga atar saka linük tesem ajungalen shibangba ajanga pei talidak tesemi moteti anenzüka alirtem meshibangtsü aser quarantine facility atema shimteta aliba tesemtem meshibangtsüla.
5. March 06, 2020 sülen state telungi aitba nisung ajaki Self Declaration COVID19 Nagaland App amshitsüla aser register asütsüla.



Dimapur, Metsüremi/March 29: COVID-19 tashidak wara nungi kümzüka alitsü mechi state sorkar aser Dimapur DC ajanga osang balala sangdongba nung ajemdaker Lengrijan colony, Dimapur nung Lengrijan Village Council aser Lengrijan Youth Organization lungjemer March 29, 2020 nü Lengrijan telungi aitba lenmangtem shibanga aliba noksa ka yangi angur. Iba tashidak (coronavirus) nungi jenbua alitsü mechi Lengrijan Youth Organization ajanga mapang shia PA system ajanga nüburtem kilung nung alitsü sangdonger aser nikondang 2:00 ako nungi anepdang 8:00 ako tashi ajungben rongdak nungdak dak alaka shinga Lengrijan telungi aittsü mesüra Lengrijan nungi aotsü memelar.

DNSU-i F&CS department dang mepelar

Dimapur, Metsüremi/March 29 (TYO): Coronavirus (COVID-19) tashidak wara tamajung prokshiba nungi nokdangtsü mechi public health emergency ka ama Central sorkari linük ajunga anogo 21 shibangtsü sangdonger alidang aser NGO aser lokti tentet balalai meranga inyaka makamaiter aser talisa talidak ki malirtemi timtem balala ajangshiba khuret ajemdaktsütsü mechi chiyongtsü aser osettsüset balala agütsüba mapang Food and Civil Supply department ajanga Priority Households agent tem dang April 15, 2020 tashinung ita atem indang sen jelia deposit asütsü totuyuba agütsüba angazüka Dimapur Naga Students' Union (DNSU) aoksar, ta sangdong ka ajanga lemsatet.

Tang ama tensa tamajung, kong makamaitertem tali tim atemba mapang aser Central sorkari ita asem talila jang-otzü angadi agütsütsü sangdonga lia komaser sorkar indang department kati iba amala totuyuba agütsütsü bilemteter, ta DNSU ajanga asüngdang.

Central sorkari nungdakba osettsüset angadi agütsütsü

totuyuba aser sangdong agüjang tagütsü, item meraji sorkari agütsü tim, ta parnoki ashi.

Maneni parnokisa COVID-19 tendangba oset maliba atema süoki ia bilemba lemsateta liasü.

Linük aser kidanger state nung COVID-19 tashidak tali putetba mapang item osettsüset agi anungba ajanga nübur tali tsübuteper aser nüburtem asoshi lendong tulu kümogo. Anungji menua melie sorkari tekeratiba nung COVID-19 testing lab amenoktsüla, ta DNSU ajanga ashi.

Doctor, Nurse, police personnel aser sorkar agency balalai coronavirus tashidak prokshiba nungi nokdangtsü mechi asentzü sena meranga inyakba asoshi kanga pelashishia agizüker, ta Dimapur nung kakatshir tentet ajangasa ashi.

NGO balalai nungdakbapur nem senotsü aser osettsüset teyari agütsüba asoshi kanga pelar aser ano maneni tanga lokti tentet, arogo, charity, kin balalaika pei aliba tesem nung makamaiter aser talisa talidak ki maker nem teyari agütsütsü ayongzüker, ta DNSU sangdong ajangasa ashi.

YWCA Mkgi COVID-19 anema raraba nung shilem agir



YWCA Mokokchung-i achayanga yangluba face mask telok balala nem angati lema agütsüdang tangokba noksa nung angur. Mokokchung, March 29, 2020

Mokokchung, March 29 (TYO): Alima ajunga nung Covid-19 tashidak anema raraba nung nungitta aser iba tongpang raraba nung yaritepa Young Women Christian Association (YWCA) Mokokchung-ia face mask aser shiranger anepalurtem tashidak memenatsü atema sobuba PPE yangluba mapatong ka tenzüka, Mokokchung nung tongtibangtisa shirnok iba tashidak raraba nung mayang süa inyaker, item teloktem ayimjemtsü nükla yur inyaksü meranger.

Market nung face mask ajema akümba ngua YWCA-ia iba mapatong ya 14th March, 2020 nungi tenzüka inyaker. YWCA Mokokchung-ia sponsored asüba Vocational Training Center den yaritepa züngsemtemi angati nübu tenlaa item nungdakba osettemji yanglu aser senotsüji YWCA züngsem kari tenla agütsü, ta osang ajanga angazüker.

Tang tashi nung parnoki yaria alirtemji; Mokokchung CMO staff, district administration,

police, osangzüurtem (media), Fazl Ali College nung Hand Sanitizer Project nung inyaker volunteer-tem, civil hospital (IMDH), MMC staff, Longjang PHC, Covid-19 Task Force Tongdentsuyong ward-tem lir. Iba den repsema medical fraternity den angatetepa YWCA-ia Aongza Youth Organization den külem sür yaritepa oset tajung amshia yangluba PPE set kar renemtsüogo, ta angazüker.

Iba osangbeneri YWCA tir, Temjensangla Pongener den telephone ajanga jembidang, YWCA-ia iba mapa ya tongtibangsa temeim, aria bilem aser teimla osang sangdongtsü nükjidong nung inyakba lir. Iba den külemi Christian tesayuba nung aliba ama ajaki asen lokti asoshi peii akok nung yariteptsü ayongzüker, ta lai ashi. Iba mapang nung tamakoktemji lenmang aisü nung alitsü akok saka tajungren bilema asenoki inyakdi süra lenmang aika lir aser ibaji ajanga nungdakbapur asoshibo teyari tulu asütsü, ta laisa shisem.

Guwahati nung alirtemi police nem chiyungtsü agütsü



Assam state police-i yimdong nung aliba azütem nem chiyungtsü agüja senzüdang agiba noksa ka angur. (Guwahati, March 29)

Guwahati, March 29 (Agencies): Deobarnü Guwahati nung alirtemi parnok telongtet nung aliba police nem süngo aser amtsük agüja temeim sayuogo.

Iba mapa tajung ya Guwahati Police-i pelashishia agizükba metetdaksüogo.

"Guwahati yimti nung nisung tajungtemi police nem süngo aser amtsük agütsür" ta Guwahati Police-i Twitter nung osang metetdaksü.

Police-i nisungtem dang coronavirus prokshiba azüoktsü atema kilung dang kazütsü aser olulu meprokshtsü atema tetuyuba agütsür saka nisung kari nüngdak mali ser yimdong nung senzüba atema pua merenshiogo.

Külen, linük ajunga shibangba mapang Assam police-i yimdong nung shirururtem anepalur.

Assam state police-i parnok indang Twitter handle nung

police-i yimdong nung aliba azütem nem chiyungtsü agütsüba noksatem kar sayaogo.

Iba mapa nung International Human Rights Organisation (IHRO)-i police den yaritepa liasü.

Special Police Unit personnel den IHRO-i tanü Guwahati yimdong nung azütem nem chiyungtsü agüja senzü, ta Twitter nung metetdaksü.

Mizoram nung COVID-19 anema protective gears yanglur

Aizawl, March 29 (Agencies): Tawa tu Mizoram nung arishi küm 50 tain tambur ka dak COVID-19 aketba putetba sülen local tailors aser designers-i Personal Protective Equipment (PPEs) yanglutsü tenzükogo.

Parnoki pei pei kidang medical staff, police personnel, truck drivers aser Mizoram nung Local Task Force atema protective gears arrür.

Mizoram sorkari coronavirus wara anema Centre dang nungi PPEs aika

bener arua lir saka nübertemi pei pei akokba yari iba tashidak anema mapa inyakteper.

Mizoram kübok district balala nung PPE Volunteer Committees tentetogo aser parnoki masks, boots, scrubs, disposal gowns amala yanglur.

District balala nungi nisungtemi PPEs yanglur aser parnok Whatsapp group ka ajanga osangtsüsang lemsateper.

Parnok ajak mapa lemsar inyakteper. Telok kati cuuting, kati stitching, kari

alemer ta mapa balala inyaker.

Külen, Local Task Force ta ser telok kati products agütsüyonga aoer.

Local Task Force nung sorkar mapa inyaktertem, arogo aser NGO züngsemtem dena lir.

Local Task Force-i products ji mozü kidang doctor tem dangi bener aoer aser idakji mozü agi merüktetba sülen tesem balalai belenshir.

Mizoram kübok tesem kar nungbo police-i masks tapu balala enoker aser Vairengte check-gate-ia yoktsü sentong lir.



Agartala nung aliba medical dokan ka nung nisungtem tepila yur noktaksü atema zülur yutsüba noksa nung angur. (Agartala, March 29)

Assam police ka shishilembadak asü; Tangari tepset ta kinungertemi ashir

Guwahati, March 29 (Agencies): Honibarnü Cachar district nung Assam Industrial Security Force (AISF) constable ka asü aser pa kinungtsüi la ya nisung kari tepset ta taoi tongloksür.

Ajisüaka, police-ibo pa ya high blood pressure ajanga asü ta ashir.

AISF constable ji Baktaruddin Barbhuiya ta jangjaogo aser pa ya anasa Sonabarighat yimtsung shishilembadak sür lia angu.

"Pai paan dokan kibur ka den raratepba sülen high blood pressure adoka asü asütsü akok. Par kinungertemi ashiba ama masü saka pa temang nung zübo kecha maliasü" ta Cachar Superintendent of Police, Manabendra Dev Ray-i ashir.

Pa indang mangji Silchar

Medical College and Hospital nung tendangtsü atema bener ogo, ta Dev Ray-i ashir.

Ajisüaka, Barbhuiya kinungtsüi ashiba agi la kinungbo shishilembadak nisung kari tepset.

State sorkari ozüing agütsüba alema dokantem lapoka shishilembartem adenshia liasü, ta laisa ashir.

La ya iba temeket nung aliba süngolu ka nung mapa inyaker aser nisung telok kati shishilembadak la kinungbo dak süng agi züka merenshidar ta osang angashiba sülen la asema ao, ta laisa metetdaksü.

Sorkari tenokdangba agütsüba ama pai iba ozüing benshitsü merangba agi pa dak azük, ta laisa ashir.

Iba dak sendakba nung police-i nisung pungu dang asüingdangya asütsü pua lir.

NEHU research scholar-i thermal device ka yanglutet



NEHU research scholar Vinayak Majhi aser Biomedical Instrumentation and Signal Processing laboratory nung assistant professor Sudip Paul nati NEHU registrar Prof. J.N. Nayak nem thermal device agütsüba angur.

Shillong, March 29 (Agencies): North Eastern Hill University (NEHU) nung research scholar kati COVID-19 atema thermal device ka yanglutetogo.

Iba jenjang dalang testing device ya Meghalaya nung Vinayak Majhi-i yanglu. Pa ya NEHU nung Biomedical Instrumentation and Signal Processing laboratory nung assistant professor Sudip Paul lenisüba kübok research scholar ka lir.

Parnoki anogo asem ser tesadang nung contact-less temperature device yanglutet, ta assistant professor Sudip Paul-i ashir.

NEHU campus telongtet nung nisung temang

temperature tendangba oset maliba osang angashia iba ya yanglutsü shisatet, ta paisa ashir.

March 25 nü iba device ji NEHU registrar Prof. J.N.Nayak ket nung agütsüogo.

"Onoki Shillong aser Guwahati nung teka agi amba thermometers alitsü bushitep saka mangu" ta Prof Nayak-i osangbener dang ashir.

"Ajisüaka, research scholar kati temang temperature tendangba jenjang dalang oset ka yanglutsü asüingdang aser tang ibaji campus nung amshir" ta paisa ashir.

NEHU nung alirtemi ashiba agi, iba osetji tang university campus indang kishi tongtiba nung nisungtem screen asütsü atema amshir.



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 30, 2020

Temulung lemtetba

Mapa takok angutsü asoshi yariteptsü atema tashi angudakji temulung lemtetba ya lir. Temulung lemtetba ya medemer o medemer na tsüngda, tsüraburtem o tanurtem na tsüngda aser lokti o lenirtem na tsüngda dang masü saka, talisa, yimten yimsüsürtem o nübortem na tsüngda kanga akanga alitsü nüngdaker. Temeim, teputep aser akümtsübutep ajak ya temulung lemtetba nungi adoker. Temulung melemtetra, shitak jembiyonga tiyazü jembir amai dang bilemtsü. Temulung melemtetra asen nem tangari ki tazüng ka nuka yutsütsüa shisabolua bilemtsü aser shidi ka oa nisung ka nem agütsütsü asoshia arendaktsü. Aji oda, asenok timtem lendong mapang nunga teyari meshiyonga tangari teyari agütsütsü nungnanga bilemtsü. Ibaji mesüka, tang alima ajaklen coronavirus tashidak mesen agi nisungtem tasüba lendong agi amokmerenba mapang, iba tashidak wara anema raratsü asoshi Nagaland Chief minister-i nübortem dang senotsü teyari meshiba anema nisung aikati 'social media platforms' nung ola adokba angur. Atangji, iba tashidak wara agi amokmerenba ya tilateri mapa ka masü saka kiojen ajak raksatsütsüsa China len nungi tenzüka Italy, Spain, England aser America nungi asen lima tashi yipru mopung tulu arur amai lir. Ibaji asen lima tonga marudangsa nokdangtsüla aser atong nunga asenok melaotsüsa aser takoksa tulu majurutsüsa renema atatsüla. Ibayongji, state government-i dang masü saka center government-i dena nübortem dang nungi teyari meshir. Atangji, ibai pei tajangzük bushitsüba aser meshitsüba mapang masü saka agütsütsüba mapang lir. Iba tangatetba nung, nüngtugu nisungtem aser company tulutemi center aser pei pei state government nem senotsü teyari tulu agütsüba asenoki angur. Ano, Hindu nungertem tekülem tenla kitem nungia sen crore aika center government nem tenla agütsüba asenoki angashir. Hindu nunger tamangertemi pei tekülemdak oagi sen dang masü saka sen aika alang hon aser taribi tenla agüja parnok tsüngrem külemer. Iba jagi yimti tulutem nung lapoka aliba Hindu nunger tenla ki tulutem nung ketdangser putirtem ket nung sen crore aika alang rongsen bendena lir. Item nung jagi tang ama linük nung nübortem asoshi teyari nüngdakba mapang tenlar. Asenoka arogo aikati pei akok tang tashidak wara den raraba sentong nung amshitsü asoshi senotsü tenla agütsüba nguogo. Tangar amaji asenok kija kibong, lokti tentet aser arogotemia tenlatsüla. Ajisüaka, asenok asoshi tebilemtsü kaji, nübortemi yimsüsürtem dak temulung melemtetba ya asütsü. Tetezü, tenla agütsüyonga nüngdakba purtem asoshi amshitsü masü saka parnoki chia adoktsü nung ta temulung melemtetba. Tongpang teraradak nung sepaitem tashi mait akümtsü aser lenirtem tezü atangtsübaji iba ama temulung melemtetba o nungi tenzüker aser tongpang akoktsü melen meraradanyongi laoadoker. Atangji, lendongbang nung yimsüsürtemi teyari meshi nung nübortemi mulungsua agütsütsü melen, taitsüang aitsütsüsa aliba jenjangji yimsüsürtem menden nung kanga bilemdangtsüla lir. Tang tashi nung, tesasatsüka, government nung alirtemi Nagaland renloktsü atema aser tang ama nüngdak mapang teyari shitak angutsü asoshi center-i yokba senotsü shitak amshia inyakba kuli mali. Nagaland nungbo, tia makatibaji, center nungi nübortem asoshi aruba senotsüji nübortem ket matongyonga aser shitak amshia terenlok mapa meinyakyonga nübortemi ola madoker. Teburshir aser terepranger mali, anungji sademsadema awazür. Aji oda, onok asoshi aruba senotsü to koda (?) ta bushiteptsü melen, parnoka election nung endokba sen to menoktsü nüngdak nung koda, ta dang nübortemiang lenchi arua bilemer. Tanü Nagaland tasenba nung nübortem o yimsüsürtem na ajurutepta tia maka lenjemji aji lir. Aji shitak amai saka tasüba wara agi amokmerendanga nübortemi yimsüsürtem dak temulung melemtetba alibaji yang nung jagi tenzüker. Tsükchirbo tonga arudagi saka asenok o asenok na temulung lemtetba tongpang nung nokdaktetsüsa asenoki tsüngchisa melitet aser ochishia meinyaktet nungji, mulungsua yariteptsü melen aitsütepa amonger. Tsüngrem taochi agi asenok mesamara, tarutsü nungbo, asenok kati ka dak temulung lemtetba alitsüsa ajaki shitak inyaktsü aser indangindanga tsüngchisa alitsü tenzüki.

OLEMSABANG CORONAVIRUS

- Talitemjen Imchen

Tanü alima nung coronavirus tashidak adoker, iba tashidak koktettsü atema mozü menguteti shirangtepba mapang lir. Taoba mapangtem nungbo, makamait mesüra timtem kar ajurudang, America England Russia amala, parnoki anir, rongsen lenmang süshia, nok o nü tsütsü süshia, teyari agitepa timtem dang tongzüktep aser nüngdaktem peritepa aru. Tanübo iba coronavirus wara ya, America nungeri tetsübuba, England nungeri tetsübuba, Russia nungeri tetsübuba lir. Missile agi kadangtsü makoker, mozü tajungtiba agi manepteter. Shiba dak temulung lema shir dak teyari asüngdangtsü? Alinük takar makar, tulu tila ajaki iba coronavirus wara tsübuba mapang ka.

Raradang amshitsü nok o nü tesashi, tayimtsü tapu balala, jahaz tapu balala, injang merangpong aser bomb paika yangluteta akaba to, iba coronavirus wara matsüngdangbo nüngdak mali amajok kümogo. Tongpang nung raratepdang wainshina rarateptsü atema arangtet (training) balala agir ajak to, pei pei nok o nü amshiba ajak doktsür, kilempoki iba coronavirus wara tsübuba agi aita lir. Shishilemadak tesemtem, kaketriju aser lokti sendendak tesem ajak shipangogo. Iba wara nungi jenputsü asoshi scientisttem-i tang tashi ngutetba ajak agi, wara nungi ajentsüla. Nisung o nisung na yongtsü nung kanga anasatepa melii kipok nung atsüker alitsüdang.

Iba coronavirus wara tashidak agi alinük ajunga nung atonger aser nisung aika teküzmüklen tajung mengui asür. Joko linük balala nungi Tirtem aser Ato kilonsertem kati ka anemteper masü saka coronavirus tashidak kodaser akoktsü jembiteper. Linük ka nungi teyariteper, wara jagi atongnungbo asütsü ta meteta liaka, kibong aser kinünger matsüngdang teka ayiploktsür, linük kati or ammangi sangwa küma shirangertem yariteper.

United Nation Organisation (UNO) ajanga coronavirus wara aliba agi alima ajunga Emergency sangtongogo. Koba tetezü alima lentongpang nung lir. Asen lima yimtsüng kar nung iba wara ya aru asübo, yim ajunga meküzmükletti asütsü menua maka. Asenok ajak tinyaktsü ka ka lir. Alima özüngi wara nungi kümzüka alitsü indang kechisa ashir, asenoki ajemalua tashi angatsü nüngdaker.

Coronavirus wara ya Tsüngrem-i meteta lir. Alima nungi kodang iba wara agintsü Pai meteta lir. Tsüngrem tenüng amer nepurtem kati ka tepsetteper. Ano Pa tenüngsang ken tena, Pa temeshiba Lai o zünga telok kati telok ka makdoktsü atema, nok o nü tesashi yangludenba jagi alima sünga kümogo. Tsüngremsa tajungbaji, meimchir ajaki Pa tali jangjaa metetdaktetsü asoshi, iba tatasaba wara coronavirus ya alimai yok asü ta tashitemeteter aikati shisadanger. Aseni dang, Tsüngrem-i molungba amaji kodang liteta, Pa molung chidaktsüdir, Tsüngremi alima nung iba wara ya bener oadoktsü.

Alima nung mamangertem aika dang lir. Mamangertem-i yanglutetba nok o nü aika tagidak mali kümogo. Parnoki iba coronavirus ajanga Tsüngrem ka lir ta metetsü nibo kanga tamang akar. Aser tamangertem-ia, temulung nung balaka aser tepang agi balaka ta amangtsü masü, saka adangji nung, iba coronavirus wara ajanga Tsüngrem tali jangjaa metetba ka südaktsü ayongzöker.

OZÜ KÜMER SANG (T.KEN 91:3 (HIDDEN DANGERS)

- N.Imo Longkumer

Ozü aputsü atema miima yutsüba dang ozükümba sang ta ajar. Ibai Aor kidong ka tenüng to masü. Iba bentetsü atema olasü agi bendangtsü. Ozükümer (high tone) Ozükümer kidong. OZÜKÜMER (low tone) ozü sang. Ozüi memeteti miima sang yutsüba. Ozü kümba mapaji yamai inyaker:- Arem süngdong kar nung ozü tapu ajaki sabua achiba süngjang atanger ibaji achitsü atema ozü tulu tila ajak sendener. Pei-pe mapang nung tedem-tedem iba süngdong bushia arutsü. Anungji itemji aputsü atema sang yutsür, tongtipangsa "Angi" amshir. Pentochepechep kaket nung mazapangi kodanga mungudangba Tenüm ozü tuluka apubaji Angi agi süngjang akhümba nung apuba liasü. Küsa mapa ya ozü ayongi tzüyongi aidang aputsü atema Angi agi tzü akümer. Yamala tasa balala amshia ozü apur. Item ajakji ozükümba mapa lir.

Ozükümba mapa nung tekümdangtsüji yamai:- Anepungi süngjang dongi tur Angi kümdaka yutsübaji ozü tilakati danga ngura iba nü jibo süngjangdong jagi ozü kata marutsü. Kechiaser ozü intelligent (SMS) ji ajanga septsü-tentsülen ajakleni osangji prokshir. Ozü akümsangi anepdang yakta ano ozü mesaakdang ozü katia mungui Angi ji kümdaka yutsüra tulu ozü dena Angi ji menaloker ali nung tsüksü. Ano pei-pe mapang nung ozü tedem-tedem arua süngjangaong nungji oloktsü aser aser Angi jagi menar ali sünga tsüksü. Idangji ozü ozükümsang jagi ajakji putena tepsettsü mesüra lemtaa kümdaktsür kidangi bener aotsü kechalen nungia jenputsü makok.

Shibai ozü atema sang aso pa dangji ozükümer ta ajar. Iba mapa ya ajungpen taküm samadaktetsüba ashikülak mapa lir. Anungji Laishiba nungjia ozükümer sang ta amshi südi. Kecha mebilümi taküm samaba sang nung apuba.

TEKÜMDANGTSÜ: Satan-ia ken tena, Lai zünga sarasademer. Aji Tsüngrem tenüng asanger masü saka meimchiri aji ngua shidak-a ta bilüma parnok den atentsü aser molumi-i anir aitsü atema tepuatsü mapa inyaker. Anungji Yisu Khristaji kibur aser kümtetdakba ta magizüki züzüa amangertem satani shinba, ken atenba, Lai azüngba leni aor. Asenok mekümdangi züzüa lira ken tena, lai zünga, sarasadema satan den molumi-i aotsü. Sataner sentung dangi memeteti Tsüngrem chirtem bener aoba lemandang "ozükümer sang" ta ajar ta angateter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo nung revival ka agiba sülen nisung 10 dak coronavirus putet



March 29, 2020: Hopta ana tejaklen Illinois nung aliba Pentecostal Arogo ka nung asentenshi sentong ka agiba sülen iba Arogo nungi züngsem 43 shiranga hospital-i anir ao aser parnok rongnung nisung 10 dak coronavirus tashidak putetogo.

Bodhbar aonung Facebook post ka ajanga Life Church of Glenview nung pastor, Anthony LoCascio kinüngtsü, Layna LoCascio-i, March 15 nü par Arogo tekülem sentong nung adener nisung 80 nungi nisung 43 shi shiranga liasü, ta metetdaksü.

“March 15 nü tekülem sentong agiba sülen ozü Arogo nungi nisung 43 shirang. Parnok ajak dak iba tashidak metendang saka tendanger ajak dak iba tashidak putetogo. Ajak dak kasa temaitsü (shirangba temaitsü) liasü. Na lenir ka mesüra Arogo nung pastor inyaka lia ajak dak iba tashidak menara ibaji tebilemtsü ka lir,” ta lai ashi.

Arogo lenirtemi ashiba agi, Governor-i kidang nungi mayazüksü tetuyuba agütsüba sülen iba ya atalok, ajisüaka ketdangsertemibo lokti senden tulu nung nisung 1000 dak tema madenshitsu aser nija sentongtem nung timba agia

nisung 250 dang adenshitsu atema sangdonger liasü.

Osangbener den jembidang Pastor LoCascio-i, tamasabo pai asentenshi sentongji thinentsü atema bilema liasü, saka iba tesem nungji coronavirus tashidak aketer kar dang aliba den külemi o jembitsü atema tangalen nungi ainer jaoka aliba ajanga tatem sabo iba sentong agitsü lemtet, ta metetdaksü.

“O jembitsü atema onoki tangalen nungi ainer jaoka liasü aser onoki iba sentong ajungketja aruogo. Onoki züngsemtem dang na temang mejungi lira iba sentong nung madentsü metetdaksür liasü,” ta pastor-i ashi.

Pastor Anthony LoCascio-isa, iba sentong methinenba ajanga tejaoker evangelist, Eli Hernandez densema nisung aika timtemi iogo, ta ashi.

“Ozü Arogo nung tongti lenir ka cancer agi shiranga liasü, aser tang pa hospital nung pneumonia, azü infection aser Covid19 agi shirangdar. Pa temang kanga mejungi ICU nung lir. Ibaji ajanga kü kinüngbu (pastor) kanga mepelar. Pa-a temang mejungi lir,” ta Layna LoCascio-i facebook post ajangasa metetdaksü.

Layna LoCascio-i ashiba agi, tawa la kinüngbu aser evangelist, Eli naji Chicago nung ayongzükba ministers' conference ka nung dena liasü. Iba mapang nungji Chicago nung coronavirus tashidak teprokdak liasü, anungji parnoka iba mapang nungji mena asütsüa akok.

“Iba ya ozüng kibong nung ang ataloker asünungbo kecha balaka mesüla, saka ozü Arogo nung aika dak mena. Onok dak Covid19 alibaji onoki memeteti liasü,” ta lai ashi.

“Onoki tejaoker den züngsem aika jaoka liasü. Ibaji tatembangbuba sentong liasü aser tajung aika atalok, tanela temeshii nüburtsem semdang aser sayatenya-a ataloka liasü. Pai (Hernandez) tamang jenjang indanga jembia liasü, saka tangbo pa hospital nung lir,” ta lai ashi.

“Kütsü-a iba tashidak menar kanga aketer. Ajisüaka kü Tsüngremi kü nüngdak dang nungi tali agütsütsü, asen nüngdak ajak agütsütsü! Pa tang mekorai liaka tamalena ni Pa ola angashiogo aser tarutsü nunga ni Pa ola angashitsu. Pai onok dang ozü Arogo nung asentenshi milak jangrutsü ta nangzuka liasü. Ni mapudaksü, ni tetsübu matsüngdang mapudaksü,” ta lai ashi.

Layna LoCascio-isa Arogo indang Facebook page nung lai la kinüngbu lasüng amshia yariba lemsatepogo.

World Health Organization (WHO)-i lasüng ya temang atema junger aser lasüng nung antimicrobial properties keta lir ta shiogo. Ajisüaka lasüng achiba agi coronavirus nungi kümzükba kulibo nguteta mali.

ANO GO ABEN TSÜNGREM DEN

SENSAKER DANG YARIBA TEPEN (T. KEN 41)

“Shibai sensaker dang aria bilemer pai Kibuba nem aputsür, aser pa mapa tajung asoshi pa nem Pai shia agütsütsü.” (A. Shin 19:17).

Tangar asoshi asen teka temoatsüba ka asütsü sarasadem ka - kotaker Oba, kü teka lapokjang!

Ne teka teti salaa lir. Pelaa agizükba aser moatsüba teka. Kodang Ne chir kangki nung Pa teka salar asü Nai ibai tabensa jungkai adoktsü.

“Mulungsoa agütsütsü kü teka salajang, Kibuba. Kü teka ajitrepatokra ni koda junga asazüka agütsütsü? (Luke 6:38). Kibuba Yisu O ni teti bilemtetta alitsü kü dang yariang, “Tagizükba dang nungi tagütsüba tali temoatsüba” (T. Mapa 20:35). Nai onok nem Ne chir aser Ne Tanela teti tatem makai agütsü. Nai onok nungi tajung kecha sotta mayur (Rom 8:32). Kü tekai agütsütsü tekara aser agizüktsü milungi südakjang. Kotak nung kü rongsen rizüngjang (Mt. 6:19-20).

“Kibuba, tashi maitertem yaritsü kü teka songlajang. Zükla alir yaritsü asoshi kü teka Hur aser Aaron teka ama lidakjang (Anitet 17:12). Ni kü teka melen tebilemba tagütsüdaktsü. Azüa aliba tzütok ni mesükdangtsü aser mokozü alungba mi meremseptsü (Mt. 12:20).

Timtem nung alir yaritsü kü teka salajang. Tanü alima nung ni Khrista temang züngsem ka ama Pai Pa taka salaba ama kü teka salajang. Sensakertem yaritsü asoshi kü teka kodanga ania tekümdaktsü kechiaser alima sensaker teti alitsü ta nai ashi (Tazüng. 15:10-11). Ni maneni asüngdang aser Nai menungnangi agütsür (Yakob 1:5). Süra ni sensaker ken dang nungi tali meshir arutsütsü?

Temeim Oba, ni Ne nem magütsüdang kü tekai kwiben temenen mapa inyak! Ni tang aria bilemba mapa inyadkjang. Ni kü teka Ne sabang nung yutsür, Na meteni ni kecha inyaktsü makok. Kü dang yariang ta ni Yisu tenüng nung sarasadem. Amen.

Coronavirus agi tesem balala nung pastor asem süogo



Abelen nungi Achiji : Rev. Isaac Graham, 66, Macedonia Baptist Church, Harlem, N.Y.; Landon Spradlin, 66, Gretna, Va.; aser Pastor Ronnie Hampton, New Vision Community Church Shreveport, La.

March 29, 2020: Tawa coronavirus tashidak putetba sülen pastor asem süogo aser par asem rongnung anatibo, tamangertem mashileni anitsü aser Khristantem ola madokdaksütsü atema iba tashidak ya mojingi hadir ka ama amshir, ta jembia liasü.

Parnok rongnung pastor

kati, Tsüngrem osang proktsü atema Tsüngremi pa dak iba tashidak amshitsu mesüra pa nem anisüngzük agütsütsü, ta jembia liasü.

New Vision Community Church (Shreveport, Louisiana, aser Washington) nung pastor, Ronnie Hampton dak coronavirus tashidak

putetba sülen Bodhbar aonung asü. Pa dak coronavirus tashidak putetba sülen anogo ka dang lirbo pa süadok.

Pa masüadang pai social media ajanga, Khristantemi coronavirus metsübutsüla, ta jembia liasü.

Pa shirang yipten nung lia paisa, pa mapang tatsüka

anisüngzükdaksütsü atema Tsüngremi iba tashidak menadaksü asütsüa akok, menadaksü keter Tsüngrem o proktsü atema asütsüa akok, ta jembia liasü.

“Tang prokba tashidak ajanga kechi inyaker. Iba ya ajanga ajak shibangdaksür, koba tetezü Khristantem longjemba raksatsür. Asenok Asenoki temeim melemsatepteter. Asenok ajurua meliteter,” ta hopta ka tejaklen pastor, Hampton-i Facebook nung Live broadcast süa liasü.

Ano Harlem, New York City nung aliba Macedonia Baptist Church nunga mapang talangka nungi pastor inyaker, Rev. Isaac Graham dak coronavirus putetba sülen Amongnü süogo. Pa arishi küm 66 liasü.

Pa kinüngtsü, Cheryl-i, pa tasünü tashi ventilator nung liasü aser la dang nungi pilar ayu, ta ashi.

Maneni Virginia nungi kentener aser sayutsüngir, arishi küm 66, Landon Spradlin-a iba tashidak agi Bodhbar nepdang süogo.

Osang angazükba agi, Spradlin ji New Orleans nung pa kinüngtsü Jean den külemi lia ajungbena shiranga Gretna, Virginia nung aliba par kidangi meyipa ao. March 17 nü par kidangi aoba mapang nung pa temang tamajungba küma tangu junga mesashitet, anungji lai Concord, North Carolina nung aliba hospital kati pa anir aoba sülen anogo ka lir pa dak coronavirus puteta liasü.

Jean Spradlin dakbo iba tashidak meputet saka la kinüngbu asüba mapang tashi nung la ‘quarantine’ kübok liasü.

Par chir pongu rongnung ka, Judah Strickland-i, “Kübu ya Yisu meimer ka liasü,” ta ashi.

Ano lar jala, Jesse Spradlin-ia, “Kübu ya tanü putu nung tenyar Paul liasü” ta ashi.

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü nai tangari aginütsüsa jembitetsü. Na agitsü timba bilemetsü akok. Tapu ajak nung kangbo shisa mebulutsüla.



Taurus
20/4-20/5

Tanü nü shisatsüi ashiba angatsü merangang. Kinüngertemi ashibaa meindoktsüla. Nü metok meperi kar nai meteta akümtsü.



Gemini
21/5-20/6

Tanü ya kinünger sasep nung olemtep tajung kar aktsü anogo tajung lir. Nai mapa tajung kar inyaktetsü akok. Nija maparen kar asoshi aini aotsüsa akümtsü akok.



Cancer
21/6-22/7

Tanü külem inyakertem den tesendaktep tajung lia inyaktsü nungdaker. Tangatettep tajung kar nung nai-a shilem agitsü akok. Nungdak maliba nung mapang meindoktsü merangang.



Leo
23/7-22/8

Tanü business atema anogo tajung asütsü. Tezüngzüktep agitsü asoshi mapang tajung. Nikongdang nai bilemba kar mataloktsü akok.




Virgo
23/8-22/9

Taoba mapang inyakba mapa kar asadangtsü anogo tajung asütsü. Bilema alibatem memonui mapa akümtsü merangang. Kar dang nü tebilemba shinüa aitsü akok.



Libra
23/9-22/10

Nisung kar o tanang ajanga na ashiokdaktsütsüa akok. Olemtep mapang na tali mejembitsü merangtsüla. Tangar o ajak kara kara mamangtsüla.



Scorpio
23/10-21/11

Nendaka inyakba ajanga mapang shitak nung ajak ataloktsü. Amajok nung mapang kanga melalutsü merangtsüla. Nü teinyaktsü mapa ajak anepdang tsütsü inyak tajungba asütsü.



Sagittarius
22/11-21/12

Tanü nü sempet sayutsü mapang tajung asütsü. Tangari ashiba kanga tenoka angatsüla. Nü tembar kati nü teyari nungdaktsü akok.



Capricorn
22/12-19/1

Tanü nikongdang nü tangatetba tera anünga akümtsü akok. Kibong nung tangatettep tajung kar adoktsü akok. Telemtetba kecha magitsü merangang.



Aquarius
20/1-18/2

Tanü anogo tom tashi nung sensaksem kar nung mazüngtsü. Oset tila kar aliba anogo asütsü. Mangatettep ajak tangari memeteti tembangtetsü.



Pisces
19/2-20/3

Tanü nai bilema aliba sentong kar ataloktsü akok. Business asoshi anogo tajung asütsü. Nikongdang benjung kar nung shilem aginüa bilemetsü akok.

Dua Lipa-i la indang kensep tasenba sayatsü mejangjai liasü



indang jembioigo aser lai kechiba mezüngbo iba kensep mesayanüi liasü iba indang lemsatepa liasü, ta femalefirst.co.uk sangdong ka ajanga metetdaksü.

"Ni küsasa dak kanga temulunglemteta

Metsüremi/March 29, 2020

(Agencies): Nüngtugu kentener Dua Lipa shibai tawa la indang kensep tasenba 'Future Nostalgia' sayaogo, lai ashiba agi coronavirus tashidak pokteter kanga kara prokshia aoba mapang ka nung kensep sayatsü asoshi mejangjai liasü.

Apple Music indang New Music Daily nung Zane Lowe den sensaksemba mapang Dua Lipa-i, la indang kensep tasenba

iba kensep yanglu tenzüik aser ken mejemtsü asoshia lenmang shidak nguteter ama bilem aser iba atema ni kanga nema adanger. Auh iba amala mapang ka nung kensep sayatsü mesayatsü mejangjai liasü kechiyong nüburtem aika timtem tekangshi nung lir aser alima ajunga nung tatalokba jenti ataloka odar aser koba mapang shidakar mejangja," ta lai ashi.

Ajisüaka lai iba kensep

ajanga nüburtem tebilemba tangalen kati meyipdaksütsü aser parnok ajungmesotsü imlar.

"Ni iba iba kensep ya anxiety, anibelem, tangar tebilemba aser tanabuba kensep yanglutsü asoshi nongshiba nungi jembotsü asoshi yanglu. Ni iba kensep temeim agi yangluogo aser ni jangradema yanglunüa liasü aser ni medemertem den iba kensep yangluogo," ta lai ashi.

"Tanga mapang dang nungi iba kensep sayatsü asoshi tanga ya mapang shidak ta bilem. Iba ajanga alima nung tang mepetmesü adoker aliba nungi nüburtem tebilemba anintsü aser parnok sadoka kümdaktsütsü aser tsüngsangtsü asoshi maongka agüja alima nung tatalokbatem amatokdaktsütsü imlar," ta kenteneri ashi.

T-Series aser Bhushan-i crore 12 tenla agütsütsü nangzük

Metsüremi/March 29, 2020

(Agencies): T-Series tekolakba Bhushan Kumar-i, linük nung corona virus den raraba nung mesemtsü aser teyari maparen balala nongita yaritsü atema Prime Minister's Citizen Assistance and Relief in Emergency Situations Fund, mesera PM CARES Fund nem sen crore 11 tenla agütsütsü nangzükogo. Iba den bendenloksema Bhushan-i par kibong tenüng nung Maharashtra CM relief fund nem sen crore 1 tenla agütsütsü agütsüogo.

Bhushan-i Twitter ajanga iba tenla agütsüba sangdongogo. "Tanü asenok ajak mapang tamajung ka nung lir aser teyari

agütsütsü asoshi asenok ajaki akokba tashi inyaktsü kanga tongtibang lir. Ni aser @Tseriesfamily-i PM-CARES Fund nem sen crore 11 tenla agütsütsü nangzükoger. Asenok ajak longjemer iba den raratsü aser asenoki akoktsü, Jai Hind (sic)," ta pai zülutsü.

Ano tanga tweet ka nung pai, "tenüngdakba mapang ka nung ni aser @Tseries nung ozü kibongi CM relief fund nem sen crore 1 tenla agütsütsü nangzükoger. Iba timtem mapang ya yakta ajangtetsü imlaa atar. Kidang kazüang, kümzüka liang," ta ashi.

Tang COVID-19 tashidak pokteter linük ajunga timtem nung aliba amala jungdak mapang

amshitsü asoshi taoba mapang sorkari PM CARES Fund amenok. Iba fund nem tenla agütsür dang saru magitsü, ta sangdongogo.

"Wadang balala nungi nüburtemi COVID-19 anema India raratsü asoshi tenla agütsütsü jangraba lemsatepogo. Iba dak ajemdaker Prime Minister's Citizen Assistance and Relief in Emergency Situations Fund amenokogo. Iba ajanga India nem teyari tulu agütsütsü," ta PM MOdi-i Honibarnü metetdaksü.

Iba trust indang mendenbubaji Ato Kilonser lir aser züngsemtem rongnung home minister, finance minister aser defence minister densema lir.

Salman-i film industry nung ayanger 25000 yaritsü

Metsüremi/March 29, 2020

(Agencies): Bollywood nung nüngtugu actor Salman Khan-i, linük ajunga mokdang aliba mapang film industry nung anogoshia ayanger 25,000 nem senotsü teyari agütsütsü nangzükogo, ta Federation of Western Indian Cine Employees (FWICE) sangdong ka ajanga metetdaksü.

FWICE tir B N Tiwari-i ashiba agi, Salman-i pa indang Being Human Foundation ajanga ayangertem nem teyari agütsütsü asoshi organization den tongtepratepa liasü.

"Salman indang Being Human Foundation-i anogo shia ayangertem nem teyari agütsütsü tejakdangi aruogo.

Parnoki anogo asem tejakdang onok den tongtepratepa liasü. Onok kübok inyaker lakh 5 shi lir aser parnok rongnung nisung 25,000 shi senotsü nungdaka lir.

Being Human Foundation-i item ayangertem anepalutsü ta shiogo. Parnoki ayanger 25,000 indang account tejangja metetnua asüngdangogo kechiyong parnoki sentem parnok ket indang indanga tongdaksüner," ta Tiwari-i PTI dang ashi.

Kasa mapang nung Bhojpuri actor aser politician Ravi Kishan-ia Bhojpuri film industry nungi technician tem nem teyari agütsüdar. Pai tenüngdakba purtem nem ration agüja arudar.

Maneni Akshay Kumar-ia Prime Minister Narendra Modi indang coronavirus relief fund nem sen crore 25 tenla agütsütsü nangzükogo.

Hopta tetenzüklen film yanglur aser actor Karan Johar, Taapsee Pannu, Ayushmann Khurrana, Kiara Advani, Rakul Preet Singh, Sidharth Malhotra, aser Nitesh Tiwari nungger ajaki

ayangertem nem teyari agütsütsü asoshi tenzüka inyakyim nongita yaritsü nangzükogo. International Association for Human Values, Art of Living Foundation aser Indian Film and TV Industry-i tenzüka I Stand With Humanity-i anogo shia ayangertem nem anogo 10 atema chiyongtsü agütsütsü.

March 18 nü Producers Guild of India-i, film, television aser web productions shibangba ajanga kongshir aliba anogoshia ayangertem atema relief fund ka amenokogo.

Sudhir Mishra, Vikramaditya Motwane aser Anurag Kashyap nungger densema film yanglurtem aikati linük mokdanga ayuba ajanga ayangertem dak kongshiba tebilemetsü kaa lemsatepba sülen anogo ka lir iba telemtetba ya agia liasü.

TAN HOPTA ATEMA - KOMA SÜLA ?

Q. Coronavirus tashidak mesen alitsü südi ta temulung melemi bilemertem tendanga anogo ishika tesem balaka nung anidena ayutsü (quarantine) atema arogo shiai pei arogo tenla ki mesüra guest house mela nunga koma süla ?

Olong 20 shi nung April 03, 2020 tashi nung iba telangzüba ya onok dangi (e-mail - tiryimiyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Paytm-i PM CARES Fund atema sen cr. 500 tenla agütsütsü



Metsüremi/March 29, 2020 (Agencies): Prime Minister indang Citizen Assistance & Relief in Emergency Situations Fund (PM CARES) atema sen cr. 500 tenla agütsütsü teblemba lir, ta Paytm-i ashi. Kasa mapang iba payment sabang-isa külem sensopurtem dang mulungsoa PM' Fund nung tenla agütsütsü asoshi ajungshia liasü.

Iba den bendenloksema, Paytm-isa ashiba agi, iba sabang nung wallet service, UPI aser Paytm debit card amshia payment asüba shia atema sen 10 agütsütsü.

"Paytm app aser

instrument tem amshia transaction asüba shia atema onoki sen 10 agütsütsü. Item sen ya indang indanga PM-CARES fund-i yoktsü. Iba ama tensa (COVID-19 den raraba) ka nung Sorkari mapatong balala asameyanga inyaba nung Paytm-i akok tashi bendanga agüja nungita yaritsü, ta Paytm President, Madhur Deora-i ashi.

Paytm user temi 'PM?CARES Fund' option ya app indang homescreen nung angutsü. User temi iba fund page lapokdang, Sen 50, Sen 100 aser Sen 250 atema donation option asem angutsü. Iba den külemi, user temi PM

Fund nung pei mulungba jenjang tenla agütsütsü atema ano option ka angutsü. Tenla agütsütsü mulungertemi iba app nung sen jenjangji enter sür sülen, pei tenüng den PAN? number tejangja agütsütsüla.

Iba maapren dak sendakba nung, Paytm-i ashiba agi, nüngdakba nüburtem atema tekümzüksü osettsüset alitsütsü mechi, tenla agütsüba ajak benden tenzüko.

Paytm-isa, Covid-19 den raratsü medical instrument tem mesüra mozütem yanglutsü asoshi item yanglur mongintem yaritsü atema sen cr. 5 fund anapalutsüogo, ta metetdaksü.

Mi True wireless earbuds den Mi TV 4S saya

Metsüremi/March 29, 2020 (Agencies): Taoba hopta tetenzüklen, London nung Xiaomi-i parnok indang flagship Mi 10 series saya liasü. Mi 10 and Mi 10 Pro indang global variant smartphone ana den külemi, Xiaomi-isa tanga product tem sayaogo. Item rongnung Mi TV 4S aser wireless earbuds kar densema lir.

Xiaomi indang product tasenba - Mi TV 4S ya Euro 549 (Sen 46,000) asütsü aser iba TV ya taküm June ita nungi tenzüka Europe linüktem nung ayoktsü. Iba dak alaka, Mi True Wireless Earphones 2 jenjang Euro 79.99 (Sen 7,000) asütsü, saka shishilembadak iba earphones ayoktsü asoshi osang tejangja ka sangdonga mali.

Xiaomi Mi TV 4S 65-inch

Xiaomi indang Mi TV 4S nung 65-inch 4K display den HDR 10+ display aser 85% NTSC colour gamut inoka yanglutsüogo. Mi TV 4S nung 2GB RAM aser 16GB of built-in storage inoktsüogo aser TV ya Android 9.0 out-of-the-box ajanga run asütsü. Connectivity

atema, TV nung feature talisa HDMI port asem, USB ports, dual-band Wi-Fi aser Bluetooth keta aliba angutsü. TV yagi Chromecast support asütsü aser OTT (Over-the-top media service) sabangtem angutsü. Mi TV 4S nung remote control den voice control aser 10W speaker ana angutsü.

Mi True Wireless Earphones 2

Mi True Wireless Earphones 2 ya Xiaomi nungi tanabuba wireless earbuds asütsü aser iba earbuds ya Apple AirPods ama design kasa keta aliba angutsü. Iba earphones nung

14.2mm drivers inoktsüogo aser device yagi noise cancelling den ENC (Environmental Noise Cancellation) support asütsü. Iba wireless earbuds ajanga music playback, voice calls aser voice assistant den double taps atema touch control support asütsü. Iba den külemi, wireless earphones 2 yagi Bluetooth high-def tone technology aser built-in sensors ajanga achaayangba in-ear detection support asütsü.

Xiaomi Mi 10 Lite 5G den Mi 10 Pro o Mi 10 sayaogo



Metsüremi/March 29, 2020 (Agencies): Taoba ita China nung Xiaomi-i flagship smartphone tasen ana saya Mi 10 aser Mi 10 Pro liasü. Tang Xiaomi-i alima ajunga nung iba smartphone ana den külemi series indang tasembuba smartphone Mi 10 Lite 5G sayaba sangdongogo. Iba series nung Mi 10 Pro ya temaba variant ka lir, koba tanabuba jenjang nung Xiaomi Mi 10 Lite 5G ya asütsü.

Xiaomi Mi 10 Pro smartphone ya variant ka - 8GB RAM aser 256GB inbuilt storage nungang angutsü aser iba handset jenjang EUR 999 (Sen 83,000) jungnüa asütsü. Mi 10 smartphone ya 8GB +128GB storage aser 8GB RAM + 256GB storage version nung angutsü aser variant anaaprong jenjang ya EUR 799

(Sen 66,800) aser EUR 899 (Sen 75,200) asütsü. Ano külen, Mi 10 Lite 5G jenjang EUR 349 (sen 29,200) asütsü aser handset ya sentsü pezü nung angutsü.

Xiaomi Mi 10 Lite 5G Xiaomi indang Mi 10 Lite 5G yagi 5G connectivity support asütsü. Iba smartphone ya Qualcomm Snapdragon 765G processor aser LPDDR4X RAM ajanga power agütsür. Mi10 Lite nung 6.57-inch AMOLED Truecolour display den waterdrop notch aser in-display fingerprint sensor inoka yanglutsüogo.

Smartphone tesülen 48-megapixel sensor, 16-megapixel sensor den külemi tanga camera ana densema camera pezü keta aliba angutsü. Handset inyakyim

tsütsü 4160mAh battery ka ajanga achaayangtsü aser charging atema 20W fast charging support asütsü. Iba den bendenloksema, handset nung Quick Charge 3.5 tech inoktsüogo.

Xiaomi Mi 10 Pro

China nung sayaba variant ama, Mi 10 Pro nunga specification kasa keta aliba angutsü. Handset tejaklen 6.67-inch AMOLED display keta lir, koba refresh rate ji 90Hz asütsü. Iba handset ya Qualcomm Snapdragon 865 processor, LPDDR 5 RAM, UFS 3.0 aser Adreno 650 GPU ajanga power agütsür.

Camera atema, Mi 10 Pro tejaklen quad camera setup den 108-megapixel primary sensor, 20-megapixel, 12-megapixel aser 8-megapixel sensor keta aliba angutsü. Handset inyakyim tsütsü 4,500mAh battery den 50W fast charging ajanga nungittsü.

Xiaomi Mi 10

Mi 10 Pro ama Xiaomi Mi 10 nunga specification timbaka kasa angutsü, saka handset ana tsüngda tesülen camera setup balala asütsü. Mi 10 tesülen 108-megapixel sensor den külemi 2-megapixel camera ana aser 13-megapixel camera inoka yanglutsüogo. Iba handset nung 4,780mAh battery den 30W fast charging inoktsüogo. Tanüngba feature tem Mi10 Pro ama kasa asütsü.

Kanika Kapoor dak pezüben buba COVID-19 tendangtet



Metsüremi/March 29, 2020 (Agencies): Bollywood kentener Kanika Kapoor dak coronavirus tejangja tan agi pezübenbuba tendangteta aser ibaji ajanga lar tsürabur den k i n u n g e r t e m shisabuludaktsüdar, ta sangdong ka ajanga metetdaksü. Kanika, shiba dak coronavirus tendangba sülen March 20, 2020 nü hospital-i anir oa liasü, la ya London nungi March 9, 2020 nü India tonga aru aser lai Kanpur aser Lucknow tesemi oa amungba mapang la temang meta aser aketa shirang.

Kanika dak iba tashidak tendangtetba sülen, lai party balala nung senzüa iba virus prokshiba ajanga media-i la kanga sashia aija liasü. Party tem nung Kanika senzüaka, la den ajuruteper ka dak danga iba tashidak tejangja puteta meliasü.

Tang, Kanika ya Sanjay Gandhi Post Graduate Institute of Medical Sciences (SGPGIMS) nung mungdar aser idakjia lai asüküm jakla sayaba ajanga hospital achaayangertemi la aija liasü. Kasa mapang Kanika adianu

kati ashiba agi, "Tang la dak iba tashidak putetba osang angazüka onok kanga shisabulur. Kanika nem treatment agütsübaji la temang agi magizüker/la nem agütsüba mozü agi mapa minyaker aser tang linük tesem ajunga shibanger aliba mapang ka nung tayimtsü ajanga tanga mozüki tajung kati anir aotsüji tamakoktsü lir. La iba wara nungi taneptsü angutsü asoshi sarasademtsütsüba dak alaka tanga lenmang kecha mali."

SGPGIMS nung doctor temi, Kanika temang tajungba lir, ta ashi.

Ita tentenzüklen, lokti sentong balala nung Kanika-i oa adenba atema, lokti nung timtem adokdatsütsüsa ozüng alemba inyakba nung ajemdaker la anema ken o benok. Sarojini Nagar police station, South Delhi nung Indian Penal Code (IPC) indang Sections 188, 269 aser 270 kübok Kanika anema ken o benoka liasü. Iba FIR ya Lucknow nung chief medical officer (CMO)-i züluba complaint ka nung ajemdaker benok.



New Delhi, March 29, 2020: Coronavirus anema raratsü atema PM-CARES Fund asoshi tenla agüja paramilitary sepaitemi Union Home Minister, Amit Shah nem cheque agütsüba noksa nung angur. Sepaitemi ita ka itasen nungi bendena ajak agi sen crore 116 tenla agütsüogo.

State 6 nung nisung 106 dak coronavirus putet; nisung 6 asü: Health ministry

New Delhi, March 29 (Agencies): Amongnü health ministry-i, tesüiba ghonda 24 tsüingda state trok nung nisung 106 dak COVID-19 tashidak putetogo aser parnok rongnungi nisung trok süogo, ta metetdaksü.

Health Ministry nung Joint secretary, Lav Agarwal-i, tang tashi nung linük nung nisung 979 dak coronavirus putetogo, aser nisung 25 süogo, ta metetdaksü.

Indian Council for Medical Research (ICMR) nungi R Ganga Ketkar-i, tang tashi nung linük nung nisung 34,931 dak iba tashidak ali-mali tendangogo, ta metetdaksü.

"ICMR network nung capacity ji shilem 30 shi dang lir. Onoki laboratories timba amenokogo aser lab 113 bo amshi tenzükogo aser coronavirus tendangtsü atema nija laboratories 47 nem temelaba agütsüogo," ta paisa metetdaksü.

Home Ministry nungi Joint Secretary, Punya Salila Srivastava-i, tanü tashi nung aayangertem nem taa shidak agütsütsü atema mapa agütsürtem dang tuyutsüla aser linük mokdangba mapang nung taa kecha mekatitsüla, ta tuyuogo ta metetdaksü. Iba dak alia ali kiburtem dang linük

mokdangba mapang nung ki para magitsü tuyuogo..

Laisa, kidang nungi aayangertem kangshia memeindoktsüla, ta metetdaksü.

Lai ashiba agi, aayangertem pei kidangi meyipa aoba nokdangtsü atema sorkari state tem dang state/district arrtsütem ajak shibangtsü tuyuogo, ta metetdaksü.

Laisa, linük anogo 21 mokdangba mapang nung metokmeperi aika ajangshidar, aser iba atemaji metetpelatsü atema NIMHANS-i toll-free number - 08046110007 tenzükogo, ta metetdaksü.

Centre sorkari state tem dang state arrtsütem shibangtsü tuyur

New Delhi, March 29 (Agencies): Coronavirus tashidak anema linük tesem ajak shibanger aliba mapang nung tangalen nungi aayangertem senzüsempogba junga nokdangtsü atema Amongnü Centre sorkari state sorkartem aser Union Territory administrations dang state aser district arrtsü ajak shibangtsü atema tuyuogo.

Chief Secretaries aser DGPs den video conferencing ajanga senden amendang Cabinet Secretary Rajiv Gauba aser Union Home Secretary Ajay Bhalla nati, linük maneni shibanga lir anungji yimitem aser highways nung nisungtem mesenzütsüla, ta metetdaksü.

"Linük tesem kar nung aayangertem kanga senzüteper. Ibaji nokdangtsü atema district aser state arrtsü ajak shibangtsüla," ta sorkar ketdangser kati metetdaksü.

Ajisüaka khu (osettsüset aser chiyungtsü) abenba garitembo senzütsü melatsüla, ta sorkari metetdaksü.

Item tetuyuba benoka

inyaktsüji District Magistrates aser SPs khuret asütsü, ta ketdangsertemisa metetdaksü.

Mapa inyakba tesem nung aayangertem aser nungdabapurtem nem chiyungtsü aser tejenokdak anepalutsüogo, ta ketdangsertemisa metetdaksü.

Centre sorkari linük anogo 21 tashi shibangtsü tuyuaka Delhi aser Maharashtra densema state balala nung aayangertemi tashi mangai pei yimtsüng bushia aoer, aser ibaji nokdangtsü atema sorkari iba tetuyuba agütsüogo.

Cabinet Secretary Rajiv Gauba-isa, ozüing alema pei yimdaki toudak aayangertemji sorkar indang quarantine facilities nung anogo 14 ayutsüla, ta state tem dang tuyu.

Amongnü (March 29) tashi nung India nung nisung 979 dak coronavirus tashidak putetogo, ta Union Ministry of Health & Family Welfare-i metetdaksü.

Parnok rongnung nisung 86 anepogo aser nisung 25 süogo, ta Health Ministry-isa metetdaksü.



Mumbai, March 29, 2020: Coronavirus anema linük tesem ajak shibanger aliba mapang nung Mumbai nung Rs 1 clinic nungi health workers-i kibok shia oa thermal screening agiba noksa nung angur.

Ajungbena shibangba ajanga nübur ratamatadaksür: Rahul Gandhi

New Delhi, March 29 (Agencies): Amongnü Congress lenir Rahul Gandhi-i shidi ka ajanga Ato kilonser, Narendra Modi dang, linük ajungbena shibangba ajanga nüburtem aoksadaksür aser linük nung ratamata tensa ka adokdaksüogo, ta ashi.

Congress lenirisa Ato kilonser dang linük nung coronavirus ajanga timtem ajangshiba inyakyimtem tanaben reprangshitsü mepishi.

Rahul-i, tanga linük tulutem den medemdangra India nungbo tensa balaka, anungji tanga linüktem nung inyakba inyakyimtemji yangibo (India nungbo) meinyaktettsü, ta ashi.

"India nung sensakertem aser anogoshia aayangba nung

metaloker alir nütsüngji kanga onsara, anungji rongsenkettsüing inyakyim khenyongi mokdangbaji tim masü," ta shidi nungsa shia lir.

"Loktiliba nung nüburtem kümzüka alitsü atema tajungba inyaktsüla aser aayangertem yaritsü aser tejenokdak agütsütsü atema public senotsü amshitsüla," ta Rahul-isa ashi.

Rahul-i iba tashidak nokdangtsü atema sorkari senotsü teyari agütsütsü sangdongba atema sorkar nem tenüngsang agütsü.

Paisa, ventilators ano timba yanglutsü nungdak, nisung jenti tendangtsü nungdak aser nisung aika anioktettsüsa hospital tulu amenoktsü nungdak, ta metetdaksü.

March 24 nü Narendra Modi-i television ajanga linük nüburtem den jembidang coronavirus anema anogo 21 linük tesem ajak shibangtsü sangdonga liasü.

Ano külen Modi-ia telemtetba tesashi agiba atema linük nüburtem dang tatok meshiogo.

Amongnü Modi-i, "Asenoki takok angutsüla, aser atangji asenoki coronavirus anema raraba tongbang ya akoktsü. Tang tashi nung iba tashidak ajanga linük nung nisung 25 süogo," ta metetdaksü.

Ita shia radio ajanga linük nüburtem den jembiba- Mann ki Baat radio sentong ajanga jembidang Modi-i iba tashidak anema yakbang süa rarartem nem tenüngsang agütsü.



New Delhi, March 29, 2020: Amongnü Lal Quarter Bus Stand, New Delhi nung tangalen nungi aayangertem aser parnok kibongtem yimdaki aotsü atema bus ataba noksa nung angur.

Coronavirus anema Jack Ma Foundation-i India yarir

New Delhi, Metsüremi/ March 29 (Agencies): Jack Ma Foundation aser Alibaba Foundation-i India nung coronavirus tashidak anema raratsü atema India nem sen aika jenjang alangba medical supplies agütsüogo.

Jack Ma Foundation-i Honibar Indian Red Cross Society nem item supplies agütsüogo aser tarutsü nunga maneni agütsütsü.

Amongnü Joint Secretary of Health Ministry, Lav Aggarwal-i, "Yashi onoki item oset agizükogo, aser item rongnung masks, Personal Protective Equipment (PPE) aser ventilators denema lir," ta metetdaksü.

Taküm February ita nung China nunga iba tashidak kanga buluba mapang nung India-ia China nem medical teyari oset ton 15 (seret


15,000) agüja liasü, aser item oset rongnung masks, gloves aser tanga medical osettem densema liasü.

Taoba ita 26 nü Indian Air Force (IAF) tayimtsü ka nung medical supplies kg 15,000 bener China nung coronavirus tashidak agi mejungi kongshiba yimti, Wuhan-i oa liasü. C-17 military tayimtsü nungji India nunger 80 den kidanger linüktem nungi nisung 40 anisemer meyipa anir aru.

February 8 nü Ato kilonser, Narendra Modi-i shidi ka ajanga China Tir, Xi Jinping dang, India-i China sorkar aser nüburtem atema aria bilemstsür, ta lemsatapa liasü.

Modi-isa iba tensa anema raraba nung India-i China yaritsü asüngdangba den külemi iba tashidak ajanga nisung jenti asüba atema mangyim jashi lemsatapa liasü.

COVID-19: Europe nung wara tesashiba akümer



Seoul, Metsüremi/March 29 : Seoul, South Korea nung March 29, 2020 nü arogo kati 'drive-in worship service' agütsüba noksa nung angur. Deobarnü tashinung South Korea nung COVID-19 tashidak ya nisung 9,583 dak puteta lira ser nisung 152 süogo.

Metsüremi/March 29, 2020 (Agencies): Spain health ministry ajanga Deobarnü sangdongba nung coronavirus agi par linük nung nisung tasen 838 süoko ta shia lir, aser tang tashinung iba linük nung COVID-19 agi asür ajak agi 6,528 jungogo.

US nung Honibarnü tashinung nisung 122,000 dak tema iba tashidak aliba

jangjaogo. Kasa mapang iba linük nung nisung 2,000 dak tema süogo.

Alima ajunga nung asadangra coronavirus tashidak wara yagi nisung 660,000 dak tema menepa lir, nisung 139,000 shi taneptsü nguogo aser nisung 30,000 dak tema süogo.

Indonesia nung coronavirus tashidak ya nisung tasen 130 dak puteta tang iba linük nung nisung

1,285 jungogo. Yakünü tashinung iba linük nung COVID-19 agi asür 132 liasü aser Honibarnü tashinung nisung 144 jungogo, ta health ministry ajanga ashi.

Manger mesangwa tsüingda Spain nung coronavirus agi asür nisung 838 liasü aser tang tashinung nisung 6,528 süogo, ta health ministry ajanga ashi.

Honibarnü iba linük nung nisung

832 asüba osang liasü. Honibarnü tashinung nisung 78,797 dak iba tashidak puteta lir.

China nung bendanglen nungi menar aruba ajanga iba tashidak wara tanaben poktetshitsü tsübur, ta health ketdangser ajanga ashi.

"China nung bendanglen nungi arur nisung 693 dak iba tashidak puteta lir, aser iba tetetzü iba tashidak wara tanaben tenzükshitsü lenmang sadema lir," ta National Health Commission nungi Mi Geng-i ashi.

Germany nung coronavirus tashidak nisung 52,547 dak putetogo aser nisung 389 süogo, ta Robert Koch Institute ajanga ashi.

Saudi Arabia-i coronavirus tashidak nungi jenbutsü nükjidong nung Jeddah governorate telungi aiba aser adokba ajunga shibangogo aser curfew benokogo, ta Saudi Press Agency ajanga ashi.

Kasa ozüing Riyadh, Mecca aser Medina nung taoba hopta nungi benoka lir.

Mexico deputy health minister Hugo Lopez-Gatelli linük nung nübur ajunga dang iba tashidak

ajemdaktsütsü mechi ita ka kidang amoktsü ashi.

Iba linük nung nisung 848 dak COVID-19 puteta lir aser nisung 16 süogo.

Japan nung Honibarnü nisung 68 dak coronavirus tashidak puteta tang tashinung nisung 1,700 dak tema iba tashidak yagi menepogo, ta ketdangsertemi. Japan nung coronavirus agi nisung 55 taküm samaogo.

Coronavirus tashidak prokshiba nokdangtsü teimla nung Myanmar-i Deobarnü nungi tenzüka linüki aitba visa magütsür. Myanmar nung nisung pongu dak COVID-19 puteta lir.

Thailand nung Deobarnü nisung 143 dak coronavirus putet aser ka asü, ta Thai sorkar ajanga sangdong ka nung metetdaktüsü.

Iba linük nung nisung 1,338 dak COVID-19 tashidak puteta lir aser nisung tenet süogo.

Korea Centers for Disease Control and Prevention ajanga ashiba agi, South Korea nung COVID-19 tashidak alir ajak senteper 9,583 jungogo, aser nisung 5,033 taneptsü nguogo aser nisung 152 süogo.

North Korea-i missile tendangba manener

Seoul, Metsüremi/March 29 (Agencies): North Korea-i par anüdok tsütsü tzüym nung ballistic missile mesükba ana khaloktsü, ta South Korea aser Japan ajanga ashi, koba alima ajunga coronavirus tashidak wara agi timtemtepa aliba tensa ka nung inyaker aser Seoul-i tim masü, ta aitsüogo.

Tsüküm anasa aliba Wonsan tesem nungi Deobarnü "short-range projectiles" ana khaloktsü aser anüglaki kilometer 30 shi tur meta kilometer 230 shi ao, ta South Korea indang Joint Chiefs of Staff ajanga ashi.

"COVID-19 agi alima ajunga timtemtepa mapang North Korea mitkartem mapa ya kanga tim masü aser tangsa anena atatsü ajungshir," ta JCS ajanga sangdong ka nung ashi.

Japan indang Ministry of Defense ajanga ashiba agi, iba projectiles ya ballistic missile mesüker lir aser iba ya Japan nung litesüluka mesüra exclusive economic zone kecha nunga mokongshi.

"Tawa North Korea-i ballistic missile tem khashishiba ya Japan dena linük ajunga asoshi teblemetsü tulu lir," ta ministry ajanga sangdong ka nung ashi.

Deobarnü nok-o-nü tendangba atema Pyongyang-i osang mesangdongi lir.

Ibai missile ti aser teku buba alitsü koba tan ita pezüben tendanger lir aser North Korea-i ita ka nung missile timtiba khadokba tang ya alitsü, ta James Martin Center for Nonproliferation Studies nungi

senior researcher Shea Cotton-i ashi.

"Tang amai 2016 aser 2017 nunga ongdang makai missile tendanga liasü, koba North Korea missile program nung kanga tongtibang liasü," ta pai Twitter nung zülutsü.

Taküm küm tenzükler tang tashi tendanga aruba missile tem ya tila aser meta talangi maor, koba March 21 nung tendangba KN-24 ama lir.

US-i anir tenokdangba agüja liaka aser alima ajunga tashidak wara agi sünger liaka lenir Kim Jong Un-i azüoka lir ta aser linük lungjema lir ta sayutsü mechi iba missile ya tendang südi, ta mongin kari ashir.

Coronavirus tashidak wara agi alima sünger liaka Kim-i akhi yimya nung yimsü asür aser linük lungjema lir ta sayuner saka bendanger amokmerentsü atema masü," ta Seoul nung aliba Institute for Far Eastern Studies nungi Kim Dong-yub-i Associated Press dang ashi.

"Tangar amokmerentsü asoshi tang North Korea mapang mali."

Alima nung nisung 660,000 dak tema menepa aliba virus prokshiba nungi nokdangtsü asoshi North Korea nung campaign balala agia arur.

Parnoki iba campaign dang "national existence" ta ajar saka par li nung shinga COVID-19 mali, ta shiogo. Bendangertemi ibaji mamanger aser North Korea nung iba tashidak wara poktetra lendong tulu asütsü, kechiaser yangji medical supply peria mali aser

healthcare infrastructure junga mali.

Tesendaktep tajung alitsü aser tashidak wara den raratsü asoshi amalitep akatsü asoshi US Tir Donald Trump-i Kim dangi shiti ka zülua liasü, ta taoba hopta North Korea-i ashi. Saka North Korea-i nok-o-nü tendangba indang Trump-i zülusema ali asü maliar ajibo memetdaktüsü.

UN Security Council tenzüng ajanga North Korea-i ballistic missile tendangba nokdangser aser parnoki missile aser nuclear aketba nok-o-nü yanglua tendangba asoshi iba linük nung tenokdangba tesashi agüja lir.

Tesüiba mapanga March ita asükwa nungi lemia akümdang North Korea-i ballistic missile tendangba densema military drill tem agir. Taoba küm ana tashi US den denuclearisation atema jembishinüba mapang item tendangba anena liasü.

2019 küm tetenzüklen Vietnam nung senden tanaben amendang denuclearisation ajema akümtsü asoshi Kim-i par linük nem tenokdangba agüja aliba ajemdaktsütsü akhangba Trump-i magizük, aser iba sülen linük ana tsüingda jembishinü anendaka lir.

2019 küm tatem tashinung Washington-i tenokdangba ajemdaktsütsüla, ta Pyongyang-i mapang süzkütsü aser North Korea ya nuclear aser intercontinental ballistic missile test talenba kübok malitsü, ta Kim-i December tatemlen sangdong.

Thailand tepuokdak nungi aika ajen

Bangkok, Metsüremi/March 29 (Agencies): Northeast Thailand nung tepuokdak tesem ka nung coronavirus tashidak wara pokteta lir ta olulu prokshiba sülen tepuokdak alir kari osettsüset raksatsü.

Deobarnü iba lendong atalokba mapang Buriram prison nungi ozüing nung aibelener kar jena ao, kong tetsür aser tebur ozüing nung aibelener 2,000 shi yua lir. Nisung tenet puogo, ta justice ministry ajanga ashi.

Buriram province nung aliba tepuodak nungi mokozü tulu adokba nguogo, ta osangtem ajanga ashi.

"Hopta tetenzük nisung telok tilaka nem taküm tepiyong tepuokdak ayutsü obendang agütsü aser parnoki iba tesem ya COVID-19 nungi jenbua


mali ta olulu prok," ta justice ministry nung ketdangser kati osangbener dang ashi.

"Tepuokdak alir nisung noklang ka shi adenshir kiojen raksatsü," ta paisa ashi.

Coronavirus tashidak wara prokshiba nungi ajemdaktsütsü mechi Thai sorkari March 18 nungi tenzüka tepuokdak tesemtem semdangba nokdangser.

Iba rongrong azüoktsü asoshi police tem yok aser parnoki iba rongrong mapang tepuokdak nungi jena aortema bushitsü, ta police deputy spokesman Krisana Pattanacharoen-o ashi.

Iba linük nung nisung 1,338 dak coronavirus tashidak puteta lir aser Thai sorkari province kar nung senzüsebongtsü nokdanga lir, kong nisung tenet tashi COVID-19 tashidak wara agi süogo.



Vientiane, Metsüremi/March 29 : Vientiane, Laos nung aliba Wattay International Airport nung chartered plane ka nungi March 29, 2020 nü China nung mozü meteter mongintem ayazüka aluba noksa nung angur. Laos nung COVID-19 tashidak wara den raraba nung yaritsü asoshi China nung mozü meteter mongintem den hadir balala bener Deobarnü Lao yimtiba, Vientiane tonga aruogo.

Dimapur nung Jain Samaj-i chiyungtsü lema agütsü



Dimapur, Metsüremi/ March 29, 2020 (TYO): Coronavirus wara prokshiba mapang tekümdangtsü meratem agütsü asoshi linük nunga maparen ajak shibangtsüba den külemi nisungdak khenyongi mekongshi pila alitsü asoshi tetuyuba agütsüogo.

Item tenokdangba liakasa,

Dimapur nung nüburtem tenzüksü asoshi Jain Samaj indang volunteeer temi tasü itta maparen tajung maneni inyakdar, ta Sushil Paharia IPR-i S D Jain Samaj sangdong ka ajanga metetdaksü.

Honibarnü, Kailash Jhanjhri-i anir anogo pezünububa tashi Marwari Patti meketa alirtem nem

chiyungtsü lema agütsüba dak alia, police, doctor aser nurse den volunteeer tem nem chiyungtsü packet 400, süngjanglijang aser tzi lema agütsü liasü.

Iba ama tensa ka nung Dimapur Jain Samaj-i nüburtem tem maneni yaritsü, ta President Om Prakash Sethi-i metetdaksü.

Arunachal nung ali/ki kiburi para nung alir dang sen atok

Itanagar, Metsüremi/ March 29, 2020

(Agencies): India tesem ajunga nung COVID-19 wara ajanga maparen aser sentong aika thinentzüba den külemi rongsenkettsüng tsütsü kanga mejungi kongshir aliba tensa ka nung, Arunachal Pradesh nung tangateter ali/ki kibur tajung anati mera tajung agia,

para nung alirtem dang ita ka atema sen toka liasü, ta sangdong ajanga metetdaksü.

Tang ama linük tesem ajunga nung maparen shibangtsür aliba mapang , tangar dang tatishitsü tajung sayutsü asoshi, Anüdoklen Kameng district kübok Seppa tesem nungi

Maneni, ali kibur Tadar

Babin-ia par li nung lapoka aliba dokantem indang ita ka para atoker ta sangdonga liasü.

Dada aser Babin nati mapa tajung sayutsü asoshi lemtetba atema, nisung aikati tenaprongla nem tenüngsang agütsüba dak alaka, chief minister Pema Khandu-ia tena nem tenüngsang agütsü liasü.

Coronavirus: Tripura MP-i sen crore 1 tenla agütsü

Agartala, March 29

(Agencies): Tripura Rajya Sabha MP Jharna Das Baidya-i la indang MPLAD fun nungi sen crore ka state Health and Family Welfare Department nung agütsüogo.

Tripura nung COVID-19 (Novel Coronavirus) anema inyakba mapa nung amshitsü atema Baidya-i Members of Parliament Local Area Development (MPLAD) fund nungi tenlaji agütsü.

MP Jharna Das Biadya-i West Tripura nung District Magistrate (DM) dang senji tekaratiba nung amshitsü atema mepishia metetdaksü.

Taoba anogo pezü tsüngda West Tripura District nung nisung 900 tashi Corona agi tonga aliba tesemtem nungi aruba atema Home Quarantine süa lir.

West Tripura District Magistrate Dr Sandeep Mahatma, IAS-i tanü ashiba

agi, tang tashi nung district nung Covid-19 aketer ka dang puteta mali.

Ketdangsertem aser Police-i anir Cluster teams 20-i Home Quarantine süa alirtem mapang shia semdangdar, ta paisa ashi.

Home Quarantine alema inyakertem Epidemic Disease Act aser Disaster Management Act kübok temerenshi alitsü, ta Mahatma-isa shisem.



Nagaland rural development minister, Wb. Metsübo Jamir-i Mokokchung district administration nem mask tejang 5000 aser rubber glove tejang 5000 agütsü dang tangokba noksa nung angur. Mokokchung, March 29, 2020.

Office of the RIONGSANGER PUTU, KELINGMEN

P.O. Changtongya, Mokokchung, NAGALAND

SANGDONGER

Tanü alima wara tamajungba nungi kümzüka alitsü mechi temelenshi ka maru tashi yimer bendanglen alir süshia aener süshia shianga Kelingmen süngkhümshi telungi aitsü tanü nungi (30-03-2020) memelar aser yimdaklira kasaji süngkhüm ajanga maotsü sangdonger. Kanga koda masüba

ajungben timtem kar atalokra yimsüsür den jelia tongteprateptsü akok.

Sd/

(Obendangba Jamir)

Chairman

Kelingmen Village

Sikkim police-i Crisis Response Command amenok

Gangtok, Metsüremi/March 29, 2020 (Agencies): Deputy Crisis Respond

Commander (DCRC) lir. COVID-19 den raratsü atema Nüburtem kümzüka Gangtok kübok Police yuitsütsü asoshi CRC ya Headquarters nung Sikkim tenzüksü, ta Bhutia-i ashi.

Police-i Crisis Response Bhutia-i, tang Sikkim state Command [CRC] lapoktsüogo, nung COVID-19 tensa ya ta sangdsong ajanga tazüokba jenjang ka nung lir metetdaksü. aser iba wara ka tamajungba

Iba CRC nung telok pezü kuma ao nungbo, idangjisa aser cell tenet lir; aser Crisis CRC-i maparen tenzüksü, ta Respond Commander ya metetdaksü. Sikkim IGP Avichal-i anir DIG-i ashiba agi, State nung

achaayangtsü. IGP Achival den Deputy wara tamajungba akümba) ao Inspectors General of Police - nungbo, CRC-i achaayanga Sonam T Bhutia aser DB Giri aser tensa mashi azüoktsü nati Deputy Crisis Respond ternemba lir.

Commanders ama aser CRC ya nüburtem atema Superintendents of Police par 24x7 lapoktsütsü aser Facebook o Twitter sabangtem ajanga iba maparen dak sendakba nung nüburtemi tongteprateptsü

Deobarnü, Gangtok nung aser parnok indang osangbener den jembiba aser parnok indang mapang, DIG Sonam T Bhutia- tebilembatem aser i ashiba agi, State nung ajungben telangzübatem agizüksü, ta atalokba tensa asadanga aser DIG-i metetdaksüogo.

takaratiba nung achaayangtsü CRC ya Ph.no 03592- asoshi CRC ya Sikkim Police-i 221152 ajanga Police Control Room den tongteprateptsü Bhutia ya CRC indang akok.

COVID-19 patient anasa amener ana dak tashidak meputet

I m p h a l / I t a n a g a r , Secretary P Parthiban-i ashi.

Metsüremi/March 29, 2020 Mizoram nungi sannüker,

(Agencies): New Delhi nungi shiba Netherlands nungi tawa Guwahati tashi senzüba arua liasü, taoba hopta United Kingdom nungi arur Manipur tayimtsü nung Mizoram nungi tsür ka dak iba tashidak COVID-19 tashidak alir nisung tejangja putetba sülen, northest ka anasa mener arur tetsür nung COVID-19 puteter anadak iba tashidak meputet, ta senior health ketdangseri ashi. rongnung pa (sannüker) Tetsür ana ya Arunachal tanabuba asütsü.

Pradesh kübok Tawang Parthiban-i ashiba agi, state District nungi lir, ta osang nung nisung 12 dak coronavirus ajanga jangjatsüogo. atema tetendangba agiogo,

Tenadak iba tashidak kong parnok 12 rongnung tendangtsü atema sample tem nisung 7 dakbo meputet aser Gauhati Medical College aser tanungba patient tem osang Hospital-i yoka liasü, ta Health atadar.

Kohima Lotha Hoho-i

Conference Hall amshitsü mela

Kohima, Metsüremi/ March 29, 2020 (TYO): Conference Hall den külemi Nagaland state nunga furniture aser tanga osettsüsettem amshitsü atema COVID-19 den raratsü mechi, temelaba agütsü liasü.

Honibarnü (March 28, 2020) Iba conference hall ya Kohima Lotha Hoho-i mera COVID-19 dak sendakba tajung ka agia, state nung maparen amshitsü asoshi State maparen shibangtsüba Sorkari State Control Room mapang tashi NSDMA dang ama yangluogo, ta sangdong Kezieke nung aliba ka ajanga metetdaksü.

Captain mapa abentsü Smith temsüa kümogo



Metsüremi/March 29, 2020 (Agencies): Steve Smith nem küm ana atema lenisüba mapa kecha mabentsü asoshi tenokdangba agütsür aliba Deobarnü tembangogo aser pa Australia captain mapa abentsü asoshi temsüa kümogo.

2018 küm South Africa nung ball-tampering ken o nung aitsüba sülen Smith ket nungi captain mapa agin aser küm ana Australia team manitsü asoshi tenokdangba agütsü. Pa nem tenokdangba agütsür aliba Deobarnü tembangogo aser pa shimra pai tanaben Australia captain mapa bentettsü.

Australia nunger asayartem iba hopta New Zealand den series ka tembanga asayatsü aser parnok kar Indian Premier League nung asayatsü liasü. Ajisüaka Deobarnü tashi nung taküm IPL asayatsü masayatsü mejangja aser international asayatema kodang asaya tenzüksü aja

mejangjai lir. Australia team England aser Bangladesh-i oa asayatsü aliba dena mejangjai lir.

Channel Nine television's Sports Sunday dang Smith-i ashiba agi, pa tekolok shisatsü aser temang anema alitsü asoshi meranga inyakdar. Kidang gym nung training agidar aser iba den anogo nung km 10 asemba den guitar atemtsü angazükdar.

"Tang tensa apir IPL masayatsü akok. Anogo ishika tsüngda senden mena telemtetba ka agitsü imlar.

"Ni tekolok shisatsü aser temang anela alitsü merangdar aser mapang ka nung iba asyamung asayara tajung, ajita masüyonga alima nung tang tatalokba aika lir, anungji anogo ka nungi anogoka ta liyonga aotsü merangtsü," ta pai ashi.

Cricket asaya tenzüksü sülena Smith-i captain mapa abentsü imlaa matar. Tim Paine Australia test captain lir aser arishi küm 35buba nung pa

tangbosa asaya nungi anentsü tebilemba mali ama reprangteter. White ball cricket asaya nung Aaron Finch-i Australia team kanga takok nung anidar.

2018 küm Cape Town nung tanabuba Test asayaba mapang Smith aser vice-captain David Warner nati metetsümonga Cameron Bancroft-i ball condition melenshitsu asoshi sandpaper amshiba sülen Australia cricket nung mepetmesü tulu adok.

Iba sülen Smith aser Warner na küm ka atema international aser domestic cricket asaya timbaka nung tenokdangba agütsü aser Bancroft ita teku atema tenokdangba agütsü. Iba mepetmesü adokba sülen Darren Lehmann-i coach mapa toktsü aser Cricket Australia chief executive, James Sutherland-ia mapa toktsü.

Kasa mapang nung Warner-bo tang tashi lenisüba mapa kecha mabentsü asoshi tenokdangba agütsür lir.

Tokyo Olympics thinenba atema Osaka tezüatanger



Washington, Metsüremi/March 29 (Agencies): Japan tsürtem rongnung nungtugu tennis asayar Naomi Osaka-i ashiba agi, taküm Tokyo Olympics masayatetba atema la tezüatanger saka 2021-i iba asyamung belener atutsü asoshi telemtetba agiba lai pusemer.

Arishi küm 22 tain toba world number one asayari Honibarnü Twitter ajanga, coronavirus tashidak pokteter

aliba apir iba asyamung taruba küm asayatsü asoshi belener atuba tajungba asütsü ta bilemer, ta ashi.

"Saisapong ajanga asenok tanaben longjemdaksütsü aser teti asayatetsü saka tang ya mapang tetemsü masü," ta Osaka-i zülutsü.

Sentong aser tensa kecha shiteta maliba mapang ka nung alima ajunga nungi asayartemi Olympic thinentü asoshi ashiba sülen Japan Ato

Kilonser Minister Shinzo Abe aser International Olympic Committee-i iba asyamung thinenba atatsü telemtetba agi.

"Olympics ya ni asoshi koda tongtibang aser ozü linük nung asayatsü asoshi koda nemadanga bilemer aji ajaki meteta lir. Auh taküm iba asyamung masayatetsüsa akümba atema ni tezü atanger," ta Osaka-i ashi.

"Ajisüaka 2021 küm tashitaitba asayatsü asoshi asenok ajak renemer alitsü! Ni Ato Kilonser Abe aser IOC-i kanga tasü ita telemteba agiba 100% pusemer," ta laisa shisem.

2018 US Open aser 2019 Australian Open champion Osaka-i Japan nungertem dang tashi ita alitsü shiogo.

"Tang ya linük, jenjang aser kin balala nungi nüburtem adenshir takokba tashi nisung taküm kümzüksü asoshi merangtsüba mapang ka lir. Ni atemabo ibaji Olympic tanüla lir," ta Osaka-i ashi.

NYK kibur Dolan dak coronavirus keta lir

Metsüremi/March 29, 2020 (Agencies): Madison Square Garden Company executive chairman aser New York Knicks kibur James Dolan dak coronavirus tshidak aliba putetogo.

Knicks sangdong ka ajanga Honibar aonung Dolan dak iba tashidak keta aliba metetdaksü. Ajisüaka pa kodang tendang aser kodang putet iba indang osang tejangja memetet.

U.S. major pro sports kibur rongnung Dolan dak mezüngbuba iba tashidak putetogo. Ano pa NHL New York Rangers kibur lir aser Radio City Music Hall, Hulu Theatre aser Chicago Theatre nunger ajak pa meyong lir.

"Madison Square Garden Company Executive Chairman aser Chief Executive Officer Jim Dolan dak coronavirus tashidak putetogo. Pa lokti nungi pilaa lir aser pa dak symptom aliba kangabo merprangteter. Pai maneni bendanglen shishilembaba ajak achaayangdar," ta Knicks sangdong ka ajanga metetdaksü.

US kübok New York nung iba tashidak agi tamajungba kongshir lir.

US nung state temenprongla nung COVID-19 tashidak keter alirtem putetogo saka New York nung timba puteta nisung 52,000 dak positive tendangtetogo aser nisung 700 dak tema süogo. Honibarnü tashi nung New York mozükitem nung nisung 7,300 shi liasü aser parnok rongnung

intensive care nung nisung 1,800 yua lir.

Nisung timba ka atema coronavirus ajanga tera dang kongshir aser yimra agi tonga akheter ajisüaka karbo pneumonia agi atonger aser mozüki bushia aotsüsa akümer. Iba tashidak ajanga nisung taintem aser tanga tashidak alirtem kanga bulua asür.

Dolan ya New York nung saisapong tsütsü lenla ajak nung nisungtemi tetshiba nisung ka lir. Iba ita tetenzüklen Oscar ngur aliba writer-director Spike Lee shiba Knicks' fan ka lir pai Dolan aitsüogo. MSG personnel tem den pa koba arena indang kikümtong amshitsu, iba dak sendakba nung mangatetep adokba sülen pai Dolan aitsü. Maneni taoba Knicks forward Charles Oakley dena Dolan mangatetep adokogo aser iba season asaya kar nungbo fan temi team yokang ta ayimdenogo.

March 11 nü nungi tenzüka NBA masayar. Utah center Rudy Gobert dak iba tashidak putetba sülen asaya anen. Knicks pur Utah den asaya aser iba sülen Gobert aser Donovan Mitchell na dak March 4 nü iba tashidak putet aser March 8 nüa parnok Detroit den asaya. Iba sülen Pistons center Christian Wood daka iba tashidak puteta liasü.

Gobert, Mitchell aser Wood nungerbo anepogo.

Arishi küm 64 tain Dolan ya MSG Networks executive chairman lir aser pa 1999 küm nungi Garden aser Knicks kibur lir.

Juventus asayartemi itasen ajemer agitsü mulunga agizükogo

Milan, Metsüremi/March 29 (Agencies): Juventus-i Honibarnü sangdong ka ajanga ashiba agi, coronavirus tashidak pokteter aliba ajanga April 3 nü tashi Italy nung saisapong ajak masayai atatsü telemtetba agiba sülen coach Maurizio Sarri densema asayartem indang itasen ajemtsüogo.

Sarri-i anir asayartemi euro million 90 tashi magitsü asoshi telemtetba agiogo.

Italy nung COVID-19 tashidak agi nisung 10,000 dak tema süogo aser linük ajak dang nungi parnok asür timba kümogo.

Season anena atatsü asoshi telemtetba magi tsüngda Italian champions Juventus pur Serie A nung tanabuba jenjang nung aliba Lazio dang nungi point ka agi timba liasü. Club sangdong ajangsa, parnoki March nungi June ita tashi itasen ajemer agitsü asoshi mulunga agizükogo.

Juve-isa season tembanga

asayara asayartem nem item itatem nung sen talila bendenloker agütsütsü akok, ta metetdaksü.

"Ajak asoshi timtem mapang ka nung asayar aser coach-i iba telemtetba agiba atema Juventus-i parnok nem tenüngsang agütsür," ta club sangdong ajanga metetdaksü.

Europe nung club tulutem nungi asayartemia itasen ajemer agitsü asoshi mulunga agizükogo aser club tem rongnung Germany club Bayern Munich aser Borussia Dortmund densema lir.

Juventus' nung itasen aika agütsüba asayartem rongnung Cristiano Ronaldo aser Wales nunger asayar Aaron Ramsey densema lir, shiba taoba küm Arsenal nungi Juve nung arua aden.

Hopta tetenzüklen Italian sports minister Vincenzo Spadafora-i, Serie A May ita tenzüksü imlaa atba metenzüktsü akok, ta shiogo.

BILEMDANGANG

"Tzúraa maitdang tzübu tua yuang"